

MESYUARAT KEDUA, PENGGAL KETIGA  
PARLIMEN KEEMPAT BELAS  
2020

**HARI ISNIN : 20 JULAI 2020**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 11 HINGGA NO. 56 )**

**[SOALAN NO 2 DIJAWAB BERSEKALI DENGAN SOALAN NO 18,32  
DAN 48]**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB DATO' SERI ANWAR BIN IBRAHIM  
[ PORT DICKSON ]**

**TARIKH : 20 JULAI 2020 (ISNIN)**

**SOALAN**

**DATO' SERI ANWAR BIN IBRAHIM [ PORT DICKSON ]** minta **MENTERI SUMBER MANUSIA** menyatakan unjuran kadar pengangguran negara dan anggaran jumlah penduduk yang menganggur sehingga akhir tahun ini serta menyatakan langkah-langkah yang diambil Kementerian dalam mengatasi lonjakan kenaikan kadar pengangguran terkini.

**JAWAPAN**

**Tuan Yang di-Pertua,**

1. Terlebih dahulu saya memohon izin Tuan Yang di Pertua untuk menjawab pertanyaan secara serentak bagi 11 orang Ahli Yang Berhormat yang telah membangkitkan mengenai isu kadar pengangguran dan kesan pandemik COVID-19 seperti berikut:-

- YB Port Dickson, YB Sungai Siput, YB Gerik dan YB Kota Melaka pada 20 Julai 2020,
- YB Gopeng dan YB Shah Alam pada 29 Julai 2020,
- YB Lembah Pantai pada 11 Ogos 2020,
- YB Sibu dan YB Tampin pada 17 Ogos 2020,

## **NO.SOALAN 2 JAWAB SERENTAK NO18, 32 DAN 48**

- Manakala, YB Ipoh Barat dan YB Ipoh Timur pada 25 Ogos 2020

### **Tuan Yang Di Pertua,**

2. Pandemik COVID-19 telah memberi kesan kepada landskap ekonomi serta pasaran pekerjaan di Malaysia. Antara cabaran utama yang dihadapi oleh negara ialah peningkatan kadar pengangguran.
3. Pada minggu lepas, beberapa orang ahli Yang Berhormat telah menyentuh mengenai isu program subsidi upah semasa sesi jawab soalan lisan.
4. Pada hari ini, saya sekali lagi ingin mengambil kesempatan untuk menjelaskan mengenai isu pengangguran sebab lebih ramai Yang Berhormat berminat bertanyakan soalan-soalan yang berkaitan.
5. Data terkini Jabatan Perangkaan Malaysia (DOSM) menunjukkan bahawa kadar pengangguran Malaysia telah meningkat kepada 5.3% pada Mei 2020 berbanding 5.0% pada April 2020.
6. DOSM menganggarkan julat maksimum kadar pengangguran adalah dalam lingkungan 3.5 peratus hingga 5.5 peratus pada tahun ini.
7. Antara sektor pekerjaan yang paling terjejas adalah sektor Pelancongan, Pembuatan dan Perkhidmatan dan tidak terkecuali golongan bekerja sendiri yang sebahagian besarnya terdiri daripada peniaga/pengusaha kecil-kecilan. Kumpulan pekerja ini terdedah kepada risiko kehilangan pekerjaan dan pendapatan berikutan PKP.

### **Jangkaan pasaran buruh Jun 2020**

8. Mengikut DOSM, indikator ekonomi bagi Mei 2020 menunjukkan berbanding April 2020 menunjukkan bahawa ekonomi sedang beransur pulih.

## **NO.SOALAN 2 JAWAB SERENTAK NO18, 32 DAN 48**

9. Di sebalik trend negatif dalam penawaran tenaga buruh hingga Mei 2020, keadaan ini telah bertambah baik jika dibandingkan dengan April 2020.

10. Ini adalah hasil daripada pelaksanaan pelbagai pakej rangsangan yang dilaksanakan kerajaan bagi mencapai sasaran tertentu.

11. Di samping itu, lebih banyak perniagaan yang dibenarkan beroperasi berikutan Perintah Kawalan Pergerakan (PKP) Bersyarat dalam bulan tersebut menyumbang kepada penurunan bilangan penganggur.

12. Tambahan pula, setelah PKP pemulihan mula berkuatkuasa pada 10 Jun 2020 yang lalu, keadaan ekonomi telah memperoleh kembali momentum.

13. Seterusnya ianya dijangka dapat mengekalkan pekerjaan, mewujudkan pekerjaan baharu dan mendorong pengambilan pekerja.

14. Selaras dengan perkembangan ini, dalam jangka masa pendek, situasi tenaga buruh pada Jun 2020 dianggar akan bertambah baik, manakala dalam tempoh jangka sederhana hingga separuh kedua tahun 2020, pasaran buruh dijangka terus mengukuh.

15. Ini terbukti, sehingga 2 Jun 2020, DOSM mendapati bahawa lebih kurang 12.7 juta atau 83.5 peratus pekerja telah mula bekerja berbanding 10.2 juta atau 67.2 peratus pada 17 Mei 2020.

Tuan Yang di-Pertua,

16. Kerajaan menyedari bebanan yang dihadapi rakyat dan telah melaksanakan pakej-pakej rangsangan ekonomi seperti Pakej Rangsangan Ekonomi Prihatin Rakyat (PRIHATIN) dan PRIHATIN PKS TAMBAHAN yang berjaya menyelamatkan lebih 2.4 juta pekerjaan, mengurangkan beban aliran tunai hampir 11 juta rakyat serta memberi sokongan kepada lebih 300 ribu syarikat.

## **NO.SOALAN 2 JAWAB SERENTAK NO18, 32 DAN 48**

17. Bagi mengelakkan pemberhentian pekerja secara besar-besaran dan memastikan kedayatahan majikan terus kekal, Kerajaan Perikatan Nasional di bawah kepimpinan YAB Perdana Menteri dalam usaha memulihkan ekonomi negara satu lagi suntikan pakej rangsangan telah diperkenalkan.

18. Pada 5 Jun 2020, YAB Perdana Menteri telah mengumumkan Pelan Jana Semula Ekonomi Negara (PENJANA). Menerusi PENJANA, Kementerian saya terlibat dalam pelaksanaan 5 inisiatif daripada 11 inisiatif memperkasakan rakyat melalui PERKESO dan PSMB.

19. Pada masa yang sama, satu jawatankuasa peringkat kebangsaan iaitu Jawatankuasa Khas Pekerjaan Nasional atau JKPN diwujudkan di bawah Pelan Jana Semula Ekonomi Negara (PENJANA) di mana JPKN dipertanggungjawabkan bagi menyelaraskan dan memantau pelaksanaan inisiatif PENJANA berkaitan sumber manusia.

20. Inisiatif PENJANA yang dimaksudkan ialah Program Subsidi Upah, Menaik Taraf Portal Perkhidmatan Pekerjaan Negara, seterusnya Program Insentif Pengambilan Pekerja dan Bantuan Latihan, Perlindungan Sosial dan Latihan bagi Pekerja Ekonomi Gig; dan Insentif Pengaturan Kerja Fleksibel

21. Untuk pengetahuan ahli-ahli Berhormat, JKPN ini dipengerusikan bersama oleh saya dan Menteri Kewangan. Saya sesungguhnya yakin iaitu dengan penglibatan Menteri Kewangan secara langsung akan membolehkan penyelarasan peruntukkan yang diperlukan untuk membantu rakyat akan lebih pantas dan berkesan serta menyeluruh terutamanya dalam situasi pandemik Covid-19.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' MOHD. NIZAR BIN HAJI ZAKARIA  
[ PARIT ]**

**TARIKH : 20 JULAI 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan :-

- a) berapakah jumlah laporan **penyalahgunaan lesen perniagaan** seperti menjual serta menyewa lesen perniagaan kepada warga asing yang telah diterima oleh Kementerian sepanjang tahun 2019; dan
- b) apakah strategi lain yang akan dilaksanakan bagi memastikan penyalahgunaan lesen ini tidak berulang pada masa akan datang.

**JAWAPAN (a)**

Tuan Yang di-Pertua,

1. Untuk makluman Ahli Yang Berhormat, penguatkuasaan terhadap penyalahgunaan lesen perniagaan adalah terletak di bawah Undang-undang Kecil Pelesenan Tred, Perniagaan dan Perindustrian Pihak Berkuasa Tempatan (PBT) masing-masing. Berdasarkan maklumat yang diterima daripada PBT, sejumlah 158 laporan penyalahgunaan lesen perniagaan yang direkodkan termasuk kesalahan menjual dan menyewa lesen perniagaan kepada warga asing.

**JAWAPAN (b)**

Tuan Yang di-Pertua,

1. Untuk makluman Ahli Yang Berhormat, PBT telah melaksanakan beberapa strategi bagi memastikan penyalahgunaan lesen perniagaan ini tidak berulang seperti berikut:

- (i) Membatalkan lesen perniagaan di bawah Undang-undang Kecil Bayaran Lesen, 1980 bagi kesalahan tidak mematuhi syarat-syarat pelesenan;
- (ii) Menjalankan tindakan penguatkuasaan bersepadu bersama Jabatan Imigresen Negeri dan Jabatan / Agensi Penguatkuasaan seperti Jabatan Kesihatan Negeri di kawasan-kawasan *hotspot* yang dikenal pasti sebagai kawasan perniagaan yang dijalankan oleh warga asing;
- (iii) Menguatkuasakan syarat-syarat pelesenan kepada semua pemilik perniagaan iaitu:



- (a) Lesen perniagaan yang dikeluarkan tidak boleh diserahkan, dijual, disewa, dipajak kecil kepada warganegara asing tanpa kelulusan;
- (b) Menjalankan operasi sitaan barang niaga perniagaan yang dikendalikan oleh warga asing di bawah Akta Kerajaan Tempatan 1976 jika terdapat isu kacau ganggu;
- (c) Tidak membenarkan pekerja warga asing bekerja sebagai pembantu di premis perniagaan melebihi 70% daripada jumlah pekerja. Selain itu, PBT juga melarang pengambilan pekerja atau pembantu warga asing untuk membantu penjaja menjalankan aktiviti penjajaan;
- (d) Mengambil tindakan pendakwaan di mahkamah atas kesalahan menjalankan perniagaan tanpa lesen;
- (e) Menguatkuasakan larangan menggaji / mengupah warga asing yang tiada permit / visa kerja yang sah; dan
- (f) Memastikan premis perniagaan perlu mempunyai sekurang-kurangnya 30 peratus warganegara tempatan sepanjang masa operasi perniagaan.

Sekian, terima kasih.

**DEWAN RAKYAT  
PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KEEMPAT BELAS (2020)**

---

**PERTANYAAN : LISAN**

**DARIPADA : DR. AZMAN BIN ISMAIL [ KUALA KEDAH ]**

**TARIKH : 20 JULAI 2020 (ISNIN)**

**SOALAN**

**DR. AZMAN BIN ISMAIL [ KUALA KEDAH ]** minta **MENTERI ALAM SEKITAR DAN AIR** menyatakan komitmen Kerajaan Persekutuan baru untuk menyelesaikan isu masalah bekalan air di negeri Kedah. Nyatakan jumlah peruntukan dari Kerajaan Persekutuan yang telah disalurkan ke negeri Kedah bagi meningkatkan bekalan air sejak 2018.

**JAWAPAN**

Tuan Yang Di-Pertua,

1. Kerajaan Persekutuan komited dalam membantu menyelesaikan masalah bekalan air di negeri Kedah. Untuk itu, Kerajaan Persekutuan telah meluluskan lapan projek bekalan air di negeri Kedah melibatkan peruntukan keseluruhan berjumlah RM1.64 bilion di bawah Rancangan Malaysia Ke Sebelas (RMKe-11).
2. Di samping itu, penstrukturan semula industri bekalan air negeri Kedah yang dijangka dapat dimuktamadkan pada Oktober 2020 juga membolehkan Syarikat Air Darul Aman Berhad (SADA) mendapat akses kepada pembiayaan dari Pengurusan Aset Air Berhad (PAAB) bagi membangunkan aset-aset air.

Sekian. Terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN RAMLI BIN DATO' MOHD NOR  
[ CAMERON HIGHLANDS ]**

**TARIKH : 20.7.2020 (ISNIN)**

**SOALAN**

minta **MENTERI PEMBANGUNAN LUAR BANDAR** memberi penjelasan mengapa isu kelewatan bayaran kepada kontraktor /pengusaha bas sekolah masih berlanjutan sehingga kini walaupun sudah dibangkitkan pada sesi sebelum ini. Kes terkini di mana seorang Pengerusi Pengusaha Bas sekolah di Pos Terisu, Cameron Highlands, Puan Noridah menyatakan kekecewaannya kerana tidak mendapat bayaran yang tertunggak selama 7 bulan dan terpaksa memberhentikan perkhidmatan van sekolahnya yang menyebabkan ramai anak-anak masyarakat Orang Asli tidak dapat ke sekolah.

**JAWAPAN**

Tuan Yang di-Pertua,

Untuk makluman Yang Berhormat, Kementerian melalui JAKOA sedang mengambil tindakan bagi menyelesaikan isu kelewatan pembayaran tambang pengangkutan pelajar Orang Asli berurusan dengan pihak Kementerian Kewangan. Sehingga kini pembayaran tambang pengangkutan telah diselesaikan secara berperingkat dan isu ini dijangka akan selesai dalam masa terdekat.

Untuk makluman Yang Berhormat jua, pengadu hanyalah sub-kontraktor bagi laluan tersebut dan perkhidmatan laluan tersebut masih

**NO. SOALAN : 13**

lagi diteruskan bagi tahun 2020. Tuntutan perkhidmatan laluan ini bagi bulan Januari hingga Mac 2020 telah selesai dibayar mengikut jadual. Manakala tunggakan pembayaran pengangkutan pelajar bagi laluan di Pos Terisu, Cameron Highland, adalah bagi bulan Julai hingga November 2019 (5 bulan).

Seperti yang dimaklumkan, pihak JAKOA sedang berurusan dengan Kementerian Kewangan untuk menyelesaikan pembayaran pada bulan Ogos 2020.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB PUAN SU KEONG SIONG (KAMPAR)**

**TARIKH : 20 JULAI 2020**

**SOALAN**

**TUAN SU KEONG SIONG [ KAMPAR ]** minta **MENTERI DALAM NEGERI** menyatakan status terkini hasrat Kerajaan untuk meminda undang-undang yang dianggap zalim dan menindas seperti Akta Kesalahan Keselamatan (Langkah-Langkah Khas) 2012; Akta Hasutan dan lain-lain undang-undang drakonian.

**JAWAPAN**

Tuan Yang Di Pertua,

Kerajaan berpandangan bahawa Akta Kesalahan Keselamatan (Langkah-Langkah Khas) [Security Offences (Special Measures) Act, SOSMA] 2012 masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang sedemikian bagi membanteras dan membendung ancaman-ancaman keselamatan seperti pengganas dan juga sindiket jenayah terancang.

Kerajaan komited untuk menambahbaik undang-undang keselamatan termasuk SOSMA dan Akta Hasutan. Dalam hal ini kajian yang lebih terperinci perlu dilaksanakan bagi memastikan keamanan dan keselamatan negara sentiasa terpelihara.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN RUBIAH BINTI HAJI WANG  
[ KOTA SAMARAHAN ]**

**TARIKH : 20 JULAI 2020 (ISNIN)**

**SOALAN**

**PUAN RUBIAH BINTI HAJI WANG [ KOTA SAMARAHAN ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan usaha terkini pihak Kementerian dalam memastikan kenaikan harga barangan sentiasa terkawal terutama sekali dalam tempoh selepas Perintah Kawalan Pergerakan.

**JAWAPAN**

**Yang di-Pertua,**

Kementerian Perdagangan Dalam Negeri dan Hal Ehwal Pengguna (KPDNHEP) mengambil perhatian yang serius dan bertindak memantau aktiviti - aktiviti perniagaan dalam negara dalam memastikan kestabilan harga barang di pasaran.

Sehubungan itu, kementerian sentiasa menjalankan pemantauan dan penguatkuasaan yang rapi sepanjang masa dan antara usaha-usaha yang telah dan terus dilaksanakan bagi memastikan harga barangan terus terkawal adalah:

- i. **Pemantauan dan penguatkuasaan** yang lebih agresif meliputi **seluruh rantai pengedaran dan pembekalan barangan dan perkhidmatan** di seluruh negara. **Bermula daripada 18 Mac 2020 sehingga 30 Jun 2020**, sejumlah **96,648 premis** perniagaan telah diperiksa oleh anggota penguat kuasa bagi memastikan pematuhan semua undang-undang yang dikuatkuasakan oleh KPDNHEP. **Premis perniagaan** tersebut merangkumi pelbagai jenis perniagaan seperti **kedai runcit, pasaraya, pasar awam, kedai makan, kedai kek dan roti, kedai pakaian, bengkel kenderaan dan lain-lain premis**. Daripada jumlah pemeriksaan tersebut, sebanyak **2,157 kes** telah dihasilkan di bawah pelbagai akta dengan **nilai rampasan berjumlah RM55,959,149.00**. Sebanyak **1,716 kes** telah **dikompaun** sepanjang tempoh PKP/PKPB/PKPP ini dengan **kutipan kompaun berjumlah RM946,750.00**.
- ii. Menguatkuasakan **Akta Kawalan Harga dan Antipencatutan (AKHAP) 2011** bagi mengawal pengambilan untung secara tidak munasabah oleh peniaga dengan **pengeluaran notis pengesahan maklumat harga atau caj bagi perkhidmatan dan notis bertulis di bawah Seksyen 21 AKHAP 2011**. Secara keseluruhannya, sebanyak **3,594 notis** telah dikeluarkan terhadap **pengeluar, pemborong dan peruncit barangan termasuk pengusaha**

**perkhidmatan** di seluruh negara sepanjang pelaksanaan PKP hingga PKPP melalui:

- pemeriksaan harian bagi **empat (4) kluster barangan keperluan utama** iaitu makanan kering, barangan basah, minuman serta barangan penjagaan kebersihan dan kesihatan yang telah dimulakan pada **15 April 2020** .
  - penguatkuasaan di bawah **OPS CATUT 7.0 (Dandanan Dan Gunting Rambut)** bermula pada **10 Jun 2020** dengan mensasarkan kepada penyedia perkhidmatan tersebut di seluruh negara.
  - pemantauan terhadap harga barangan **peralatan pelindung diri** bermula **17 Jun 2020** yang terdiri daripada *hand sanitizer* (pembasmi kuman), apron pakai buang (iaitu *disposable hair cutting apron* dan *disposable hair cutting cape cloth*), *disposable glove* dan alat pengukur suhu badan di peringkat pembekalan barangan hingga peruncit.
  - pemeriksaan di peringkat pembekalan barangan iaitu **peringkat peruncit di pasar-pasar awam dan pemborong** ayam pedaging di seluruh negara bermula pada **18 Jun 2020** bagi tujuan **mendapatkan maklumat harga dan kos iaitu selepas berakhirnya Pelaksanaan Skim Harga Maksimum Musim Perayaan (SHMMP) Hari Raya Puasa 2020.**
- iii. **Penguatkuasaan Perintah Kawalan Harga (Penandaan Harga oleh Penjual Runcit) 1993** yang **mewajibkan peniaga meletak tanda harga** ke atas barangan yang dijual. Sejumlah **27,940 pemeriksaan tanda harga** telah dijalankan di seluruh negara dan sebanyak **353 kes tiada tanda harga** telah diambil tindakan. Daripada jumlah kes tersebut **sebanyak 188 kes telah dikompaun** dengan **nilai kompaun RM177,800.00.**
- iv. **Melaksanakan tiga (3) Skim Harga Maksimum Musim Perayaan (SHMMP)** iaitu **Skim Harga Maksimum Musim Perayaan Hari Raya Puasa, Pesta Kaamatan dan Hari Gawai 2020.** Sepanjang pelaksanaan skim tersebut, sebanyak **33,238 pemeriksaan** telah dijalankan ke atas premis-premis di seluruh negara. Hasil daripada



tindakan pemeriksaan ini, sebanyak **147 tindakan** undang-undang telah dikenakan iaitu **32 kes melebihi harga maksimum** dan **115 kes tiada tanda harga** melibatkan keseluruhan **nilai sitaan RM18,718.00 dan kompaun RM308,500.00.**

- v. **Mengadakan program libat urus** untuk memberi penjelasan, **khidmat nasihat dan kerjasama bersama peniaga** dalam memahami dan mematuhi undang-undang yang dikuatkuasakan;
- vi. Meningkatkan **keberadaan (*omnipresence*)** pegawai-pegawai penguatkuasa di lokasi yang menjadi tumpuan pengguna bagi mewujudkan ruang persekitaran perniagaan yang selamat dan beretika.
- vii. Menangani pertanyaan dan penyelesaian aduan rakyat dengan lebih cepat dan pantas dengan menyediakan **Skuad Tindakan Aduan dan Resolusi Pengguna (STAR).**
- viii. Memudahkan rakyat mengemukakan aduan melalui pelbagai saluran sedia ada di Kementerian seperti **aplikasi whatsapp KPDNHEP 019-2794317, Portal E-Aduan, aplikasi telefon pintar Ez Adu, talian hotline KPDNHEP 1-800-886-800** dan **hadir sendiri ke mana-mana pejabat/cawangan KPDNHEP yang berhampiran.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI HASANUDDIN  
BIN MOHD YUNUS [ HULU LANGAT ]**

**TARIKH : 20 JULAI 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan mengkaji semula denda yang tidak relevan kini dalam **Akta Kerajaan Tempatan 1976** seperti:

- a) Bahagian 8, Seksyen 70 mengenai pencemaran anak sungai yang cuma didenda tidak lebih lima ribu ringgit; dan
- b) Bahagian 9, Seksyen 78 apabila sesebuah rumah diduduki dengan sesak hanya didenda tidak lebih RM2000 sahaja.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) sedang dalam proses membuat pindaan Akta Kerajaan Tempatan 1976 (Akta 171), termasuklah yang berkaitan dengan penguatkuasaan dan kadar denda yang relevan dengan kesalahan dalam Akta 171.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB DATO' HASBULLAH BIN OSMAN (GERIK)**

**TARIKH : 20 JULAI 2020**

**SOALAN**

**DATO' HASBULLAH BIN OSMAN [ GERIK ]** minta **MENTERI DALAM NEGERI** menyatakan berapa jumlah kes pemalsuan kad pengenalan dan passport yang telah dapat dikesan dan apakah langkah-langkah pihak Kerajaan membanteras kegiatan pemalsuan tersebut.

**JAWAPAN**

Tuan Yang Di-Pertua,

Berdasarkan rekod operasi yang dijalankan oleh Jabatan Pendaftaran Negara (JPN) pada tahun 2019 hingga 30 Jun 2020 bagi kes penyalahgunaan dokumen pengenalan diri sama ada menggunakan Kad Pengenalan milik orang lain atau memiliki Kad Pengenalan palsu, sebanyak 126 orang telah berjaya ditangkap dan dituduh di bawah Peraturan 25(1)(e) Peraturan-Peraturan Pendaftaran Negara 1990. Perincian jumlah tangkapan berkenaan mengikut tahun adalah seperti mana berikut:-

- a. Tahun 2019: 115 orang; dan
- b. 1 Januari 2020 hingga 30 Jun 2020: 11 orang.

Kementerian Dalam Negeri (KDN) dan JPN sentiasa komited dalam usaha memburu pengguna dan ejen pemalsuan dokumen pengenalan diri dengan menjalankan operasi penguatkuasaan di seluruh Negara di

samping kerjasama serta perkongsian maklumat di antara lain-lain agensi penguatkuasaan dalam membendung masalah berkenaan. Antara langkah-langkah yang telah dilaksanakan adalah seperti mana berikut:-

- a. Mempergiatkan aktiviti intipan, risikan, dan operasi penyalahgunaan dokumen palsu seperti Kad Pengenalan dan dokumen yang dikeluarkan oleh JPN;
- b. Menjalankan penguatkuasaan secara bersepadu bersama agensi penguatkuasaan di bawah KDN dengan lebih kerap;
- c. Menyalurkan aduan dan mengambil tindakan berkaitan pegawai/kakitangan yang disyaki terlibat ke Unit Integriti (UI) dan Suruhanjaya Pencegahan Rasuah Malaysia (SPRM) untuk siasatan lanjut; dan
- d. Memperhalus dan menambahbaik perundangan sedia ada bagi meningkatkan keberkesanan penguatkuasaan dan kawalseliaan urusan berkaitan pengeluaran kad pengenalan.

Sejajar dengan usaha Kerajaan dalam membendung masalah berkenaan, Kementerian ingin menasihatkan mana-mana individu atau institusi yang meragui ketulenan dokumen pengenalan diri untuk merujuk terus kepada KDN atau JPN bagi tujuan semakan data dan pemeriksaan fizikal dokumen.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI ABDUL AZEEZ BIN  
ABDUL RAHIM [ BALING ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan perkembangan terkini pembinaan Program Perumahan Rakyat Termiskin (PPRT) di negeri Kedah dan berapa jumlah projek perumahan terbengkalai yang dikawal selia Kementerian belum lagi terlaksana sehingga kini.

**JAWAPAN**

Tuan Yang di-Pertua,

Untuk makluman Yang Berhormat, bagi tahun 2020, sebanyak RM18.43 juta diperuntukkan untuk negeri Kedah di bawah Program Perumahan Rakyat Termiskin (PPRT). Berdasarkan peruntukan ini, sebanyak 130 unit bina baru dan 680 unit baik pulih rumah disasar untuk dilaksanakan. Selain itu, Kerajaan melalui Pakej Rangsangan Ekonomi Prihatin (PRE PRIHATIN) telah memperuntukkan tambahan sebanyak RM 6 juta lagi untuk program ini di bawah skop baik pulih rumah. Dianggarkan sebanyak 210 unit rumah dapat dibaik pulih dengan peruntukan ini.

Pada masa ini, sebanyak 50 unit bantuan bina baru rumah sedang dalam pelaksanaan dan 543 unit rumah sedang dibaik pulih. Berikutan pelaksanaan Perintah Kawalan Pergerakan (PKP), hampir semua projek PPRT sama ada yang sedang berjalan atau telah diluluskan telah tertangguh pelaksanaan mulai Mac sehingga awal Mei 2020. Oleh yang demikian, Kementerian telah mengkaji semula

## **NO. SOALAN: 19**

pelaksanaan program ini untuk baki tempoh tahun semasa dan dijangkakan jumlah unit bina baharu rumah tidak dapat dibuat mengikut sasaran asal berikutan tempoh siap rumah mengambil masa yang lebih panjang.

Atas faktor ini, dianggarkan hanya 60 unit bina baru rumah sahaja dapat dilaksanakan dalam tahun semasa. Namun begitu, bantuan baik pulih rumah diteruskan dengan pertambahan unit melalui peruntukan PRE PRIHATIN kerana tempoh masa pelaksanaan yang lebih pendek. Kesemua baki projek akan diteruskan dalam tempoh baki tahun semasa.

Untuk makluman Yang Berhormat jua, bagi tahun 2019, sebanyak projek 59 unit bina baru telah disiapkan dan 698 unit pembaikan rumah dilaksanakan melibatkan peruntukan sebanyak RM13.80 juta. PPRT Tiada projek rumah PPRT yang terbengkalai untuk tempoh berkenaan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN WONG SHU QI [ KLUANG ]**

**TARIKH : 20 JULAI 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan apa keputusan atau hasil kajian untuk melaksanakan **pilihan raya tempatan**.

**JAWAPAN**

**Tuan Yang di-Pertua,**

1. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah melaksanakan Kajian Kebolehlaksanaan Pilihan Raya Kerajaan Tempatan (PRKT) sepanjang tahun 2018 hingga 2019. Kajian tersebut telah mengenal pasti 3 aspek penting untuk pelaksanaan PRKT iaitu:

- (i) Aspek perundangan yang melibatkan akta-akta dan peraturan-peraturan yang perlu dibuat pindaan antaranya seperti Akta Kerajaan Tempatan 1976 [Akta 171] dan Akta Pilihan Raya Kerajaan Tempatan 1960 [Akta 473];
- (ii) Aspek implikasi kewangan yang melibatkan kos pelaksanaan PRKT; dan
- (iii) Mekanisme pelaksanaan yang mengambil kira peranan Kerajaan Persekutuan, Kerajaan Negeri dan Pihak Berkuasa Tempatan (PBT).

2. Buat masa ini perundingan bersama semua pihak berkaitab masih dijalankan. Sehubungan itu kajian PRKT ini masih belum dimuktamadkan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB DATO' SERI HAJI ABDUL HADI BIN AWANG  
[ MARANG ]**

**TARIKH : 20 JULAI 2020 (ISNIN)**

**SOALAN**

**DATO' SERI HAJI ABDUL HADI BIN AWANG [ MARANG ]** minta **MENTERI SUMBER MANUSIA** menyatakan apakah inisiatif Kementerian untuk membantu rakyat supaya kekal dalam pekerjaan dan mampu meningkatkan kemahiran mereka dalam menghadapi cabaran kehidupan yang terkesan dengan wabak COVID-19.

**JAWAPAN**

Tuan Yang di-Pertua,

1. Mesyuarat Majlis Tindakan Ekonomi Bil 1/2020 pada 16 Mac 2020 telah bersetuju untuk mengambil langkah tambahan bagi memperkukuhkan Pakej Rangsangan Ekonomi 2020 (PRE2020) iaitu memberi bantuan kewangan segera (*immediate financial assistance*) sebanyak RM600 sebulan kepada pekerja yang diberi notis CTG melalui Program Pengekalan Pekerjaan (ERP).
2. Manakala pada 27 Mac 2020, YAB Perdana Menteri telah mengumumkan Program Subsidi Upah (PSU) di bawah PRE 2020 dan telah ditambahbaik pada 6 April 2020 dan 5 Jun 2020 untuk memberi bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 dan ke bawah untuk tempoh 6 bulan.
3. Tujuan program ini adalah untuk membantu majikan yang terkesan dari segi ekonomi akibat COVID-19 supaya dapat meneruskan operasi syarikat serta mengelakkan pekerja hilang pekerjaan dan punca pendapatan bagi semua perusahaan.
4. Sehingga 30 Jun 2020, PERKESO telah menerima sejumlah 319 ribu permohonan dari majikan melibatkan 2.6 juta orang pekerja yang telah menerima manfaat daripada bantuan Program Subsidi Upah (**PSU**) melibatkan pembayaran sejumlah RM5.23 bilion. Manakala sehingga 30 Jun 2020, seramai 322,422 orang pekerja yang diberikan notis Cuti Tanpa Gaji melibatkan bayaran sebanyak RM193.4 juta telah diagihkan di bawah Program Pengekalan Pekerjaan (ERP).
5. Seterusnya dalam memperkasakan usaha pemulihan dan memperkasakan rakyat melalui pekerjaan, Kerajaan telah memperkenalkan Pelan Jana Semula Ekonomi Negara (PENJANA) melalui Kementerian Sumber Manusia yang merangkumi 2 komponen

utama iaitu Program Insentif Pengambilan Pekerja (***Hiring Incentive***) dan **Program Latihan**.

6. Program Insentif Pengambilan Pekerja ini bertujuan merangsang permintaan pekerjaan di kalangan majikan dan **meningkatkan kebolehpekerjaan** serta peluang pekerjaan di kalangan pencari kerja tempatan yang terkesan akibat pandemik COVID-19. Insentif di bawah PenjanaKerjaya meliputi 4 kategori yang berikut:

**#MyApprentice:** Insentif Perantisan bagi majikan yang mengambil pencari kerja tempatan secara perantis dan keutamaan diberi kepada fresh graduate atau pelajar lepasan sekolah.

**#HireMalaysia** - Terdapat tiga kategori:

- i. Insentif Pengambilan Pekerja tempatan **di bawah umur 40 tahun**;
- ii. Insentif Pengambilan Pekerja tempatan berumur **40 tahun dan sehingga 60** tahun dan
- iii. Insentif Pengambilan Pekerja tempatan dalam **golongan mudah terjejas** terutamanya Orang Kurang Upaya (OKU) dan peserta Program Return to Work PERKESO.

7. Selain Insentif Pengambilan Pekerja yang dinyatakan sebelum ini, **Bantuan Mobiliti atau (Mobility Assistance)** juga disediakan kepada pekerja baru yang diambil bekerja oleh pihak majikan. Bantuan Mobiliti ialah bayaran one-off kepada pekerja yang berpindah dari lokasi tempat pemastautin pencari kerja.

8. Bagi mana-mana majikan yang mengambil pekerja baru dibawah Program Insentif Pengambilan Pekerja, pekerja-pekerja baru tersebut boleh dirujuk untuk menjalani latihan yang disediakan di bawah program ini. **Program Latihan** ini merujuk kepada menyediakan latihan semula (reskilling and upskilling) berdasarkan keperluan majikan dan pekerja yang diambil di bawah **PenjanaKerjaya**.

**MESYUARAT KEDUA, PENGGAL KETIGA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : LISAN**

**DARIPADA : PUAN RUBIAH BINTI HAJI WANG  
[ KOTA SAMARAHAN ]**

**TARIKH : 20.7.2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan apakah usaha yang diambil Kementerian untuk mengurangkan beban petani dan pekebun getah akibat penularan pandemik COVID-19.

**JAWAPAN**

Tuan Yang di-Pertua,

Untuk makluman Yang Berhormat, antara langkah yang diambil untuk mengurangkan beban pekebun kecil getah akibat penularan pandemik COVID-19 ialah:

- i) Langkah Jangka Pendek yang memberi bantuan segera kepada pekebun kecil yang terkesan dengan penularan pandemik COVID-19 iaitu pemberian Bantuan Khas Aidilfitri 2020 kepada pekebun kecil RISDA berjumlah RM300 yang diberi secara *one-off*. Bantuan tunai ini bertujuan untuk mengurangkan bebanan kewangan pekebun kecil dalam tempoh pelaksanaan Perintah Kawalan Pergerakan (PKP).
- ii) Seterusnya Langkah Jangka Panjang turut dilaksanakan bagi menjana pendapatan pekebun kecil getah. Antara bantuan yang disediakan di bawah langkah ini adalah seperti berikut:

## NO. SOALAN : 22

- a) Bantuan Tanam Semula Getah Ke Getah bertujuan menggalakkan pekebun kecil menanam semula getah tua atau tidak ekonomik kepada klon getah yang terbaik dan diiktiraf.
- b) Skim Insentif Produktiviti Getah (SIPG) bertujuan menyalurkan input pertanian iaitu baja dan penggalak susu getah kepada pekebun kecil yang mempunyai kebun-kebun getah matang untuk meningkatkan produktiviti kebun seterusnya meningkatkan pendapatan pekebun kecil getah.
- c) Pembangunan Infrastruktur Pemasaran (PAP) bertujuan menyediakan bantuan untuk membina atau membaikpulih kemudahan infrastruktur pemasaran bagi membolehkan pekebun kecil menjual secara berkelompok untuk memendekkan rantai pemasaran seterusnya mendapat harga jualan getah yang lebih tinggi.
- d) Aktiviti Ekonomi Tambahan (AET) bertujuan menggalakkan pekebun kecil dan ahli isirumah menceburi bidang keusahawanan. Bantuan yang diberi adalah meliputi matabenda, peralatan dan bahan input pengeluaran.
- e) Program Pembangunan Usahawan bertujuan menyediakan Bimbingan dan Latihan Keusahawanan seperti Pembangunan Produk, Pemasaran Produk, Pensijilan dan Akreditasi, Jaringan Pemasaran serta Premis Perniagaan dan Pemasaran.
- f) Program Pembangunan Hasil Baharu bertujuan menyediakan bantuan kepada pekebun kecil untuk menjalankan aktiviti tanaman selain getah yang berpotensi tinggi dan boleh menjana pendapatan tambahan.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN MUHAMMAD BAKHTIAR BIN WAN CHIK  
[ BALIK PULAU ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan impak COVID-19 terhadap usahawan desa terutamanya di kawasan Parlimen Balik Pulau dan bagaimana Kerajaan membantu usahawan desa meneruskan perniagaan mereka melalui platform dalam talian.

**JAWAPAN**

Tuan Yang di-Pertua,

Untuk makluman Yang Berhormat, Impak Pandemik Covid-19 memberi kesan kepada sosio ekonomi seluruh dunia termasuk negara kita, Malaysia. Kementerian Pembangunan Luar Bandar (KPLB) memberi perhatian kepada semua usahawan luar bandar di mana kesan yang dihadapi oleh mereka secara amnya sama di seluruh negara.

KPLB telah mengadakan program *Outreach* Usahawan@KPLB secara atas talian melalui *Facebook* KPLB bermula pada 23 April sehingga 8 Mei 2020. Program ini telah dilaksanakan semasa tempoh Perintah Kawalan Pergerakan (PKP) sebanyak 5 sesi dengan penglibatan seramai 18 usahawan KPLB dan 6 wakil agensi. Sehingga 2 Jun 2020, jumlah tontonan video-video Program Outreach Usahawan@KPLB ini telah mencapai sehingga 55,268 paparan.

MARA pula telah menyediakan 3 kategori program latihan keusahawanan secara atas talian iaitu *FB Live Talk*, *Biznetwork* dan *Webinar*. Paparan kepada program *FB Live Talk* dan *Biznetwork* telah mencapai angka 494,300 tontonan setakat Jun 2020. Manakala untuk kursus melalui Webinar, MARA telah mengadakan sebanyak 15 kursus dengan jumlah peserta adalah seramai 300 orang untuk setiap sesi.

Kementerian juga akan menganjurkan Karnival Usahawan Desa secara dalam talian (online) atau e-KUD bagi mengalakkan para usahawan luar bandar agar menyertai platform Desamall@KPLB dan mewujudkan kesedaran pembeli berkenaan produk usahawan luar bandar yang boleh dibeli secara online. Program ini menyasarkan seramai 2,000 usahawan akan memasarkan produk mereka melalui platform tersebut. Pelbagai aktiviti promosi akan dilakukan untuk menarik minat para pembeli dan seterusnya meningkatkan jumlah jualan para usahawan.

Selain itu, KPLB telah melaksana inisiatif perkongsian strategik untuk meningkatkan lagi jualan produk Desamall@KPLB. Program DesaMall@KPLB membantu usahawan luar bandar memasarkan produk mereka secara dalam talian melalui platform e-Dagang seperti Lazada, Shopee, eBay, PrestoMall dan GrabMart. Sehingga 30 Jun 2020, seramai 1,407 usahawan luar bandar telah dilatih di bawah program DesaMall@KPLB dan sebanyak 21,033 SKU telah dimuatnaik ke dalam platform yang disertai oleh DesaMall@KPLB.

Impak COVID-19 terhadap pekebun kecil menyebabkan aktiviti perniagaan mereka terganggu dan tidak boleh beroperasi seperti biasa. RISDA telah mengadakan inisiatif dengan memberikan latihan dan pembangunan pemasaran produk / perkhidmatan secara atas talian (online marketing) supaya usahawan dapat melaksanakan pemasaran norma baharu melalui platform seperti Desamall@KPLB, e-Desa, Kedai Raya, MGCES, Lazada dan Shopee.

FELCRA Berhad pula merangka strategi dan menggalakkan usahawan untuk melaksanakan perniagaan secara dalam talian terutamanya menerusi platform DesaMall@KPLB. Melalui Pelan Jana Semula Ekonomi Negara (PENJANA) yang telah diumumkan oleh YAB Perdana Menteri pada 5 Jun 2020, manfaat program akan diterima oleh sebahagian usahawan bimbingan FELCRA, antaranya melalui program kempen e-Dagang kepada perusahaan Mikro dan PKS yang dikendalikan oleh Kementerian Kewangan, dengan kumpulan sasar kepada 20 usahawan bimbingan FELCRA yang akan diketengahkan dalam kempen e-Dagang tersebut bagi tujuan memperluaskan akses pasaran.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI AHMAD JAZLAN BIN  
YAAKUB [ MACHANG ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan apakah usaha yang dilaksanakan oleh Majlis Amanah Rakyat (MARA) bagi memastikan usahawan-usawahan MARA yang terjejas dengan pandemik COVID-19 tidak gulung tikar atau menghentikan perniagaan.

**JAWAPAN**

Tuan Yang di-Pertua,

Untuk makluman Yang Berhormat, MARA telah menjalankan pelbagai inisiatif bagi membantu usahawan bumiputera. Di antara inisiatif yang dijalankan adalah seperti berikut:-

- a) Penangguhan bayaran balik/moratorium pembiayaan perniagaan kepada usahawan. Untuk Makluman, Jumlah usahawan MARA yang telah menerima moratorium pembiayaan perniagaan MARA adalah seramai 2,556 dengan implikasi kewangan sebanyak RM 17.3 juta. Pemberian moratorium ini diberikan selama enam (6) bulan iaitu bermula April 2020 sehingga September 2020.
- b) Pengecualian bayaran sewa Premis Perniagaan MARA bagi tempoh dua (2) bulan dari April-Mei 2020 yang melibatkan 5,685 penyewa dengan implikasi kewangan sebanyak RM7.5 juta.

**NO. SOALAN : 24**

- c) Pemberian diskaun sewa premis perniagaan (30%) dari bulan Jun hingga September 2020 yang melibatkan 4,108 penyewa premis perniagaan dengan jumlah diskaun sewa berjumlah RM3.05 juta.
- d) MARA turut terlibat dengan Pakej Rangsangan Ekonomi (PRE) 2020 bagi melaksanakan projek berskala kecil di seluruh negara yang melibatkan kerja-kerja menaiktaraf premis perniagaan MARA yang meliputi ruang niaga dan kemudahan infrastruktur di seluruh Malaysia. Pelaksanaan projek berskala kecil ini juga dapat memberikan manfaat kepada rakyat dan merangsang aktiviti ekonomi dan memberi manfaat kepada kontraktor Bumiputera dengan peruntukan kewangan sebanyak RM50 juta. Setakat Jun 2020, Sebanyak 482 projek sedang dilaksanakan manakala sebanyak 372 projek dalam proses perolehan yang melibatkan 14 negeri di 123 daerah.
- e) Dalam meluaskan kemudahan pembiayaan kepada usahawan Bumiputera yang menghadapi kesukaran dalam meneruskan operasi syarikat. Bagi merealisasikan hasrat ini, Kerajaan melalui Pelan Jana Semula Ekonomi Negara (PENJANA) memperuntukkan dana berjumlah RM300 juta kepada MARA untuk Skim Pembiayaan Mudah Jaya (SPiM) untuk tahun 2020 hingga 2021. Skim ini dijangka akan dapat membantu sekurang-kurangnya 300 usahawan Bumiputera dengan kemudahan pinjaman modal kerja sehingga RM1 juta bagi menampung kos operasi seperti bayaran gaji pekerja, sewaan premis, utiliti dan lain-lain.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB PUAN TERESA KOK SUH SIM (SEPUTEH)**

**TARIKH : 20 JULAI 2020**

**SOALAN**

**PUAN TERESA KOK SUH SIM [ SEPUTEH ]** minta **MENTERI DALAM NEGERI** menyatakan jumlah kutipan denda oleh PDRM daripada syarikat dan individu yang melanggar PKP daripada bulan Mac hingga akhir bulan Jun 2020. Berapa syarikat dan individu telah didakwa ke mahkamah atas kesalahan pelanggaran PKP.

**JAWAPAN**

Tuan Yang Di Pertua,

Kerajaan telah mengisytiharkan Perintah Kawalan Pergerakan (PKP) yang bermula pada 18 Mac 2020 dan seterusnya diikuti dengan Perintah Kawalan Pergerakan Bersyarat (PKPB) sejak 4 Mei 2020. PKPB telah berakhir pada 9 Jun 2020 dan telah digantikan dengan Perintah Kawalan Pergerakan Pemulihan atau PKPP yang bermula pada 10 Jun 2020 hingga 31 Ogos 2020.

Lanjutan daripada pengisytiharan tersebut, langkah-langkah susulan telah diambil bagi menyelaraskan dan memperincikan pelaksanaan Perintah Kawalan Pergerakan tersebut. Beberapa siri mesyuarat penyelarasan antara agensi kerajaan telah diadakan untuk memperincikan pelaksanaan perintah-perintah tersebut dalam memastikan ianya dapat berjalan dengan baik dan lancar.

Pihak PDRM bertanggungjawab dalam menjalankan penguatkuasaan terhadap individu mahupun premis/syarikat yang ingkar PKP. Menurut maklumat yang diperolehi daripada Kementerian Kesihatan Malaysia, bagi tempoh Mac hingga Jun 2020, jumlah kutipan denda daripada syarikat dan individu yang ingkar PKP dan telah dijelaskan adalah sebanyak RM5,928,000 juta. Pihak PDRM hanya mengeluarkan kompaun kepada individu dan juga syarikat / premis sebanyak 11,379 kompaun. Seramai 21,420 individu yang ditangkap telah didakwa di mahkamah bagi tempoh 18 Mac 2020 sehingga 30 Jun 2020.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB DATUK SRI RICHARD RIOT ANAK JAEM  
(SERIAN)**

**TARIKH : 20 JULAI 2020**

**SOALAN**

**DATO' SRI RICHARD RIOT ANAK JAEM [ SERIAN ] minta MENTERI  
DALAM NEGERI menyatakan bilakah CIQS Tebedu akan dinaik-taraf.**

**JAWAPAN**

Tuan Yang Di Pertua,

Kementerian Dalam Negeri KDN sememangnya bercadang untuk membina Kompleks Imigresen, Kastam, Kuarantin dan Keselamatan (ICQS) Tebedu yang baru. Keperluan projek ini adalah bagi memastikan kemudahan keluar masuk penumpang dan barangan melalui pintu masuk ini disediakan dengan komprehensif bagi menyokong pembukaan semula aktiviti perdagangan di Tebedu susulan daripada *Border Trade Agreement* (BTA) dan *Border Crossing Agreement* (CSA) yang akan ditandatangani.

Namun begitu, KDN masih belum menerima maklum balas positif daripada Kementerian Perdagangan Antarabangsa dan Industri (MITI) berkaitan proses rundingan dengan pihak Indonesia bagiewartakan Entikong sebagai *Legal Landing Port*. Aktiviti perdagangan antara Tebedu – Entikong akan menghadapi masalah sekiranya isu ini tidak diselesaikan terlebih dahulu bagi mengelakkan Kompleks ICQS baru yang disiapkan nanti kurang digunakan (*underutilize*) sebagaimana yang sedang dihadapi di Kompleks ICQS Kota Putra, Kedah dan Kompleks ICQS Bukit Bunga, Kelantan.

Oleh itu, sekiranya terdapat perkembangan yang positif dan komitmen terbaru berkaitan pembukaan semula perdagangan melalui pintu masuk Tebedu – Entikong dalam tahun ini, KDN akan mengemukakan permohonan pembinaan Kompleks ICQS baru yang komprehensif kepada Unit Perancang Ekonomi (EPU), Jabatan Perdana Menteri di bawah *Rolling Plan-2 RMK-12*.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 20 JULAI 2020**

**SOALAN**

**DATO' NGEH KOO HAM [ BERUAS ]** minta **MENTERI DALAM NEGERI** menyatakan sama ada Kerajaan telah mula mengeluarkan kewarganegaraan secara lumrah kepada isteri warga asing rakyat Malaysia yang telah bermastautin di Malaysia selama 2 tahun kepada mereka yang memohon mengikut Perkara 15 Perlembagaan Malaysia. Nyatakan jumlah kewarganegaraan yang telah diberikan sejak 2018 kepada isteri sedemikian secara lumrah tanpa memerlukan isteri warga asing itu memegang pas lawatan tahunan untuk beberapa tahun terlebih dahulu.

**JAWAPAN**

Tuan Yang Di-Pertua,

Penganugerahan kewarganegaraan Malaysia merupakan anugerah tertinggi dan hak eksklusif Kerajaan Persekutuan yang diberikan kepada individu yang benar-benar layak dan memberi sumbangan kepada Negara. Setiap permohonan kewarganegaraan berkenaan akan diproses dengan teliti dalam memastikan setiap permohonan memenuhi syarat-syarat yang ditetapkan dalam Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Untuk makluman Ahli Yang Berhormat, **elemen permohonan** dikekalkan dalam urusan penganugerahan kewarganegaraan Malaysia isteri kepada lelaki bertaraf warganegara Malaysia bagi memastikan taraf kewarganegaraan Malaysia dianugerahkan kepada individu yang berkecukupan sahaja. Selain daripada itu, jika penganugerahan kewarganegaraan Malaysia dibuat secara automatik atau lumrah atas dasar perkahwinan, perkara tersebut dikhuatiri melibatkan penyalahgunaan dokumen atau tujuan tertentu demi kepentingan individu tersebut dan boleh menjejaskan keselamatan dan kesejahteraan warganegara sedia ada.

Berdasarkan rekod Jabatan Pendaftaran Negara (JPN) bagi tempoh dari tahun 2018 hingga 30 Jun 2020, sebanyak 4,163 permohonan kewarganegaraan di bawah Perkara 15(1) Perlembagaan Persekutuan telah diluluskan dan dianugerahkan Sijil Warganegara.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' HAJI MOHD. SALIM SHARIF  
[ JEMPOL ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan program dan latihan khusus yang disediakan bagi golongan usahawan di kawasan luar bandar untuk berdepan dengan cabaran ketidakpastian ekonomi akibat pandemik COVID-19 serta Revolusi Industri (IR 4.0) agar terus berdaya saing dalam bidang keusahawanan.

**JAWAPAN**

Tuan Yang di-Pertua,

Untuk makluman Yang Berhormat, Kementerian menerusi MARA telah menyediakan 3 program latihan keusahawanan dalam mendepani cabaran ketidakpastian ekonomi akibat pandemik COVID-19 agar terus berdaya saing dalam bidang keusahawanan. Latihan keusahawanan semasa Covid 19 yang dianjurkan oleh MARA adalah FB Live Talk dan Webinar. Pada masa yang sama, bagi membantu meningkatkan kembali jumlah jualan usahawan, MARA turut menyediakan platform pemasaran iaitu Biznetwork.

FB Live Biztalk merupakan program sesi perkongsian bersama pemain industri secara atas talian di mana usahawan terutama usahawan luar bandar dapat menimba pengalaman dan pengetahuan yang terkini bersesuaian cabaran semasa pandemik Covid 19. Sebanyak 70 slot telah diadakan dengan capaian 458,000 pengunjung sepanjang tempoh pelaksanaan program.

**NO. SOALAN : 28**

Webinar pula merupakan kursus secara atas talian yang melibatkan 300 orang usahawan untuk 15 sesi di mana setiap sesi mengambil tempoh tiga (3) hari. MARA juga melaksanakan program Biznetwork untuk membantu usahawan luar bandar mengadakan promosi dan membina jaringan perniagaan secara atas talian. Sehingga 30 Jun 2020, sebanyak 40 slot FB Live Biznetwork melibatkan 40 syarikat/usahawan telah dijalankan dengan capaian sebanyak 36,300 penonton.

Selaku agensi Kerajaan, MARA akan meneruskan program latihan keusahawanan secara atas talian di samping meneruskan juga kursus latihan secara *offline* bagi memastikan usahawan luar bandar terus bersaing di dalam bidang keusahawanan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN SU KEONG SIONG (KAMPAR)**

**TARIKH : 20 JULAI 2020 ( ISNIN )**

**SOALAN**

**TUAN SU KEONG SIONG [ KAMPAR ]** minta **MENTERI DALAM NEGERI** menyatakan secara terperinci jumlah pemohon Malaysia yang telah diberikan kewarganegaraan di bawah Perkara 15A Perlembagaan Malaysia dari tarikh 9 Mei 2018 sehingga Disember 2019. Nyatakan langkah-langkah penambah-baikkan prosedur permohonan dan pelaksanaan pemberian kewarganegaraan kepada anak-anak yang dilahirkan di Malaysia kepada sekurang-kurangnya seorang ibu atau bapa yang merupakan warganegara Malaysia.

**JAWAPAN**

Tuan Yang Di-Pertua,

Berdasarkan rekod Jabatan Pendaftaran Negara (JPN) bagi tempoh dari 9 Mei 2018 hingga 31 Disember 2019, sebanyak 968 permohonan kewarganegaraan di bawah Perkara 15A Perlembagaan Persekutuan telah diluluskan dan dianugerahkan Sijil Warganegara. Untuk makluman Ahli Yang Berhormat, permohonan kewarganegaraan individu berumur bawah 21 tahun diproses di bawah Perkara 15A Perlembagaan Persekutuan.

Dalam memastikan permohonan berkenaan diproses dengan lebih sistematik dan berkesan, Kementerian telah menambahbaik Prosedur Pengendalian Standard (SOP) Permohonan Kewarganegaraan Di Bawah Perkara 15A Perlembagaan Persekutuan dengan **tempoh pemprosesan**

**yang lebih singkat** bagi **permohonan lengkap yang diterima mulai tahun 2020**. Penambahbaikan SOP berkenaan adalah berdasarkan kepada pematuhan syarat di bawah Bahagian III Perlembagaan Persekutuan dan Kaedah-Kaedah Kewarganegaraan 1964 [L.N.82/1964] serta turut mengambil kira pelbagai aspek termasuklah kebajikan pemohon tanpa mengabaikan keselamatan dan kesejahteraan warganegara sedia ada.

Manakala, bagi permohonan kewarganegaraan lain di bawah Perlembagaan Persekutuan, Kementerian sedang mengkaji mekanisme bersesuaian sebagai penambahbaikan kepada polisi dan prosedur sedia ada. Pemerolehan kewarganegaraan Malaysia bagi individu yang dilahirkan di Malaysia kepada sekurang-kurangnya salah seorang ibu atau bapanya bertaraf warganegara Malaysia adalah di bawah Perkara 14(1) Perlembagaan Persekutuan.

Perkara 14(1) Perlembagaan Persekutuan memperuntukkan bahawa individu yang dilahirkan di Malaysia dengan salah seorang ibu atau bapa mereka adalah warganegara Malaysia layak dianugerahkan kewarganegaraan melalui kuat kuasa undang-undang, tertakluk kepada pematuhan syarat-syarat yang ditetapkan dalam Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI ABDUL AZEEZ BIN  
ABDUL RAHIM [ BALING ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan status terkini pelaksanaan Majlis Pengurusan Komuniti Kampung (MPKK) dan Majlis Pengurusan Komuniti Kampung Persekutuan (MPKKP) setelah perubahan Kerajaan di peringkat Persekutuan.

**JAWAPAN**

Tuan Yang di-Pertua,

Untuk makluman Yang Berhormat, Mesyuarat Jemaah Menteri pada 8 Julai 2020 telah bersetuju untuk menambah baik Majlis Pengurusan Komuniti Kampung (MPKK) dan Majlis Pengurusan Komuniti Kampung Persekutuan (MPKKP) dengan menjenamakan semula kepada Jawatankuasa Pembangunan dan Keselamatan Kampung (JPKK) serta Jawatankuasa Pembangunan dan Keselamatan Kampung Persekutuan (JPKKP).

Terdapat beberapa penambahbaikan yang dilaksanakan di dalam JPKK dan JPKKP ini iaitu yang pertama daripada segi prosedur pelantikan anggota. Satu jawatankuasa akan ditubuhkan di peringkat daerah / parlimen yang berperanan untuk membuat tapisan pemilihan calon anggota mengikut pembahagian komposisi parti komponen Kerajaan Persekutuan. Senarai calon anggota ini kemudiannya akan diangkat untuk kelulusan pelantikan oleh Pihak Berkuasa Melantik iaitu

Menteri Besar / Ketua Menteri bagi negeri-negeri yang ditadbir oleh parti Kerajaan Persekutuan dan YB Menteri Pembangunan Luar Bandar bagi negeri-negeri negeri-negeri yang tidak ditadbir oleh Parti Kerajaan Persekutuan.

Walau bagaimanapun, bagi pelantikan anggota JPKKP, senarai calon yang ingin dilantik perlu diperakukan terlebih dahulu oleh Pengerusi Majlis Tindakan Pembangunan Negeri (MTPNg).

Selain itu, syarat-syarat pelantikan anggota juga ditambah baik untuk memastikan anggota yang dilantik adalah layak dan berkebolehan untuk mengurus tadbir kampung dan seterusnya dapat memperkemaskan lagi sistem pentadbiran di peringkat akar umbi.

Dari segi keanggotaan, jumlah keanggotaan bagi setiap JPKK dan JPKKP masih kekal seperti dahulu iaitu seorang Pengerusi, seorang Setiausaha dan 11 Ahli Jawatankuasa. Ini menjadikan keseluruhan keanggotaan bagi setiap JPKK dan JPKKP adalah seramai 13 orang.

Penambahbaikan ini bertujuan untuk memastikan pembangunan di kawasan luar bandar dapat diteruskan dengan penglibatan JPKK dan JPKKP yang merupakan penghubung di antara Kerajaan Persekutuan dengan masyarakat kampung.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 20 JULAI 2020 ( ISNIN )**

**SOALAN**

**DATO' NGEH KOO HAM [ BERUAS ]** minta **MENTERI DALAM NEGERI** menyatakan siapakah yang dirujuk oleh Kerajaan dalam mukadimah Akta Kesalahan Keselamatan (Langkah-Langkah Khas) 2012 (SOSMA) bahawa tindakan telah diambil dan tindakan lanjut diancam oleh sekumpulan besar orang di dalam dan di luar Malaysia untuk menyebabkan keganasan terancang.

**JAWAPAN**

Tuan Yang Di Pertua,

Mukadimah Akta Kesalahan Keselamatan (Langkah-Langkah Khas) [Security Offences (Special Measures) Act, SOSMA] 2012 adalah mengikut polisi yang telah ditetapkan dan dipersetujui oleh Kementerian Dalam Negeri. Penggubalan akta juga dibuat selepas merujuk Polis Diraja Malaysia (PDRM) dan Jabatan Peguam Negara (AGC).

Justeru, merujuk kepada pertanyaan Ahli Yang Berhormat mengenai siapakah yang dimaksudkan di mukadimah SOSMA dalam frasa “bahawa tindakan telah diambil dan tindakan lanjut diancam oleh sekumpulan besar orang di dalam dan di luar Malaysia”, ianya adalah merujuk kepada individu-individu yang melakukan kesalahan yang menjurus kepada empat (4) elemen berikut:

1. Menyebabkan keganasan terancang terhadap orang atau harta, atau untuk menyebabkan sebilangan besar warganegara takut akan keganasan itu;
2. Membangkitkan perasaan tidak setia terhadap Yang di-Pertuan Agong;
3. Memudaratkan ketenteraman awam di dalam negara; dan
4. Mendapatkan perubahan, selain dengan cara yang sah, apa-apa jua yang ditetapkan melalui undang-undang.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB DATO' HASBULLAH BIN OSMAN [ GERIK ]**

**TARIKH : 20 JULAI 2020 (ISNIN)**

**SOALAN**

**DATO' HASBULLAH BIN OSMAN [ GERIK ]** minta **MENTERI SUMBER MANUSIA** menyatakan berapa jumlah terkini rakyat yang menganggur dan apakah langkah-langkah pihak Kerajaan bagi menangani masalah ini.

**JAWAPAN**

Tuan Yang di Pertua,

1. Pandemik COVID-19 telah memberi kesan kepada lanskap ekonomi serta pasaran pekerjaan di Malaysia. Antara cabaran utama yang dihadapi oleh negara ialah peningkatan kadar pengangguran. Pada minggu lepas, terdapat beberapa orang ahli Yang Berhormat telah menyentuh mengenai isu pengangguran semasa sesi jawab soalan lisan. Pada hari ini, saya sekali lagi mengambil kesempatan untuk menjelaskan mengenai isu pengangguran sebab lebih ramai Yang Berhormat berminat bertanyakan soalan-soalan yang berkaitan.

2. Data terkini Jabatan Perangkaan Malaysia (DOSM) menunjukkan bahawa kadar pengangguran Malaysia telah meningkat kepada 5.3% pada Mei 2020 berbanding 5.0% pada April 2020. Diperhatikan bahawa peningkatan bulanan bilangan penganggur pada Mei 2020 adalah lebih rendah berbanding peningkatan yang dicatatkan dari Mac ke April, iaitu sebanyak 168,300 orang. Pengurangan tersebut berkemungkinan disebabkan oleh pelaksanaan pelbagai pakej rangsangan bagi mencapai sasaran tertentu di samping lebih banyak perniagaan yang dibenarkan beroperasi berikutan Perintah Kawalan Pergerakan (PKP) Bersyarat dalam bulan tersebut.

3. DOSM menganggarkan julat maksimum kadar pengangguran adalah dalam lingkungan 3.5 peratus hingga 5.5 peratus pada tahun ini. Untuk makluman ahli-ahli Yang Berhormat, kadar pengangguran pada tahun 2018 adalah 3.3 peratus iaitu sebanyak 504,300 orang. Manakala, pada tahun 2019 adalah 3.3 peratus iaitu sebanyak 508,200 orang.

Tuan Yang di-Pertua,

4. Bagi mengelakkan pemberhentian pekerja secara besar-besaran dan memastikan kedayatahan majikan terus kekal, Kerajaan Perikatan

Nasional dibawah kepimpinan YAB Perdana Menteri telah mengambil langkah proaktif dengan memperkenalkan tiga program iaitu:

**Program Pengekalan Pekerjaan**

- (i) Program pertama adalah program subsidi kepada pekerja yang dikenali sebagai **Program Pengekalan Pekerjaan** ataupun ***Employment Retention Program (ERP)*** yang melibatkan penyaluran peruntukan Kerajaan berjumlah RM120 juta.
- (ii) Program ini bertujuan untuk membantu pekerja yang diberi notis Cuti Tanpa Gaji melalui bantuan kewangan segera dengan izin *immediate financial assistance* sebanyak RM600 sebulan bagi tempoh satu hingga tiga bulan. Sehingga 30 Jun 2020 seramai **322,422 pekerja** yang telah diberi notis Cuti Tanpa Gaji telah menerima manfaat.

**Program Subsidi Upah**

- (i) Program kedua adalah program subsidi bagi membantu majikan yang dikenali sebagai **Program Subsidi Upah (PSU)** yang melibatkan pengagihan dana Kerajaan berjumlah RM13.8 billion. Tujuan program ini adalah untuk membantu majikan supaya dapat meneruskan operasi syarikat serta mengekalkan pekerjaanya.
- (ii) Semasa pelancaran awal, program ini dimulakan dengan dana sebanyak RM5.8 billion. Atas permintaan pihak-pihak industri kerajaan telah membuktikan keprihatinannya dalam menjaga kebajikan pekerja dengan menambah dana sebanyak RM8 billion. Dengan itu, jumlah keseluruhan dana bagi program Subsidi Upah di bawah **PRIHATIN** adalah RM13.8 billion.

## SOALAN NO : 32

- (iii) Untuk pengetahuan ahli-ahli Dewan yang mulia ini, bantuan Program Subsidi Upah adalah berdasarkan kepada saiz perusahaan iaitu seperti berikut:
- (a) Pertama untuk majikan yang menggajikan pekerja 75 orang pekerja dan ke bawah, dimana kadar bayaran subsidi upah adalah RM1,200 sebulan bagi setiap pekerja;
  - (b) Manakala untuk majikan yang menggajikan antara 76 hingga 200 orang pekerja, kadar bayaran subsidi upah adalah RM800 sebulan bagi setiap pekerja;
  - (c) Seterusnya bagi majikan yang menggajikan 201 orang pekerja dan ke atas, kadar bayaran subsidi upah adalah RM600 sebulan bagi setiap pekerja.

### **Pelan Jana Semula Ekonomi Negara (PENJANA)**

- (i) Sebagai langkah memulihkan ekonomi negara kerajaan melaksanakan program ketiga iaitu **Pelan Jana Semula Ekonomi Negara** atau **PENJANA**.
- (ii) Inisiatif ini adalah untuk merancakkan pengambilan pekerja oleh majikan melalui program dengan izin ***MyApprentice, HireMalaysia, hiring incentive, mobility assistance*** dan latihan ***reskilling and upskilling***. Sejumlah RM1.5 billion diperuntukkan untuk program ini.

Tuan Yang di-Pertua,

5. Antara golongan yang turut terjejas akibat pandemik COVID-19 ini adalah golongan graduan dan belia. Saban tahun dianggarkan seramai 300 ribu hingga 350 ribu graduan menamatkan pengajian dan bersedia

untuk masuk ke alam pekerjaan. Keadaan pandemik ini lebih menyukarkan golongan ini mendapatkan pekerjaan.

6. Dalam mendepani pasca pandemik COVID-19, Kementerian melalui TalentCorp akan terus memperkasakan usaha bagi meningkat serta menambahbaik ekosistem takungan bakat negara. TalentCorp memberikan tumpuan kepada pembangunan kebolehpasaran graduan dan tenaga bakat muda negara dengan melaksanakan program-program seperti *Young Employable Students* (YES!), Program Latihan Industri Berstruktur (SIP), *Nurturing EXpert Talent* (NEXT), Kolaborasi Industri-Akademia (IAC) dan *Scholarship Talent Attraction & Retention* (STAR).

Tuan Yang di-Pertua,

7. Untuk makluman Ahli Yang Berhormat, Kementerian sentiasa berusaha melaksanakan usaha-usaha untuk mengatasi isu pengangguran. Antara usaha-usaha berterusan yang diambil adalah seperti portal perkhidmatan pekerjaan JobsMalaysia, Program Penempatan Pekerjaan, program latihan *Graduate Enhancement Programme For Employability 2.0* (GENERATE 2.0), Program Sistem Latihan Dual Nasional (SLDN), perluasan akses Latihan dan Pendidikan Teknikal dan Vokasional (TVET), pelaksanaan program *upskilling* dan *reskilling* dan menggalakkan sektor-sektor berintensif buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN WILLIAM LEONG JEE KEEN  
(SELAYANG)**

**TARIKH : 20 JULAI 2020 ( ISNIN )**

**SOALAN**

**TUAN WILLIAM LEONG JEE KEEN [ SELAYANG ]** minta **MENTERI DALAM NEGERI** menyatakan jumlah militan "Islamic State" rakyat Malaysia yang telah pulang, apakah tindakan yang diambil terhadap mereka dan langkah-langkah yang akan diambil oleh Kerajaan untuk memastikan mereka tidak melaksanakan aktiviti-aktiviti pengganas atau militan di Malaysia.

**JAWAPAN**

Tuan Yang Di Pertua,

Berdasarkan statistik daripada Polis Diraja Malaysia (PDRM), sehingga 30 Jun 2020 seramai 16 orang rakyat Malaysia yang berada di Syria telah kembali ke negara ini. Jumlah ini adalah merangkumi 12 orang dewasa dan 4 orang kanak-kanak.

Untuk makluman Ahli-ahli Yang Berhormat sekalian, daripada 12 orang dewasa tersebut, 9 orang telahpun dijatuhkan hukuman pemenjaraan oleh mahkamah, seorang masih lagi di dalam proses perbicaraan di mahkamah, seorang sedang menjalani Perintah Sekatan dibawah Akta Pencegahan Keganasan 2015 (POTA) dan baki seorang lagi telah dibebaskan. Manakala bagi 4 orang kanak-kanak tersebut, mereka telah diserahkan kepada keluarga.

Tuan Yang Di Pertua,

Kementerian Dalam Negeri melalui PDRM sentiasa memberikan komitmen yang penuh di dalam menangani ancaman daripada kumpulan pengganas. Sehubungan itu, pihak polis akan terus membuat pemantauan secara berterusan ke atas elemen-elemen perkembangan Daesh di negara ini dan tindakan penguatkuasaan akan dibuat sekiranya pihak polis berjaya mengesan mana-mana individu yang pulang dari negara bergolak yang juga dikenali sebagai *Foreign Terrorist Fighters (FTFs)* daripada kembali melakukan aktiviti-aktiviti keganasan.

Pada masa yang sama, Kerajaan juga turut mempunyai mekanisme bagi mengawal dan memantau pergerakan dan aktiviti *Foreign Terrorist Fighters (FTFs)* yang ingin atau telah kembali ke negara ini. Antara mekanisme yang dilaksanakan oleh PDRM adalah seperti berikut:

- i) pengumpulan maklumat risikan melalui kerjasama dengan agensi perisikan dan keselamatan asing bagi memantau aktiviti pengganas yang berpotensi untuk menggugat keselamatan dan kedaulatan negara serta mematahkan sebarang cubaan meloloskan diri kumpulan pengganas ke Malaysia;

- ii) meningkatkan kawalan di semua pintu masuk negara yang diwartakan dengan menyenaraihitam individu-individu yang disyaki sebagai pengganas. Tindakan ini bertujuan untuk menyekat pergerakan mereka di semua pintu masuk atau keluar di seluruh negara;
- iii) membuat tindakan penguatkuasaan sekiranya pihak polis berjaya mengesan mana-mana FTF yang telahpun kembali ke negara ini dengan melalui pintu-pintu masuk yang tidak sah;
- iv) melaksanakan program deradikalisasi atau proses pemulihan khusus kepada FTF yang telah ditangkap. Program ini dilaksanakan dengan melibatkan kerjasama pelbagai agensi seperti Kementerian Dalam Negeri (KDN), Polis DiRaja Malaysia (PDRM), Jabatan Penjara Malaysia dan Jabatan Kemajuan Islam Malaysia (JAKIM).

Program pemulihan ini telah dirangka secara sistematik dengan menggunakan Modul Deradikalisasi Bersepadu yang mencakupi aspek keagamaan, kewarganegaraan, psikologi, kekeluargaan dan nilai-nilai murni. Pada masa sama, mereka juga akan sentiasa berada di bawah pemantauan pihak PDRM selama tempoh yang dirasakan perlu bagi memastikan mereka tidak terlibat kembali dengan aktiviti keganasan.



**MESYUARAT KEDUA, PENGGAL KETIGA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : TUAN ANYI NGAU [ BARAM ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan status pelaksanaan projek Menaikkan Taraf Jalan Balak (Fasa 4) yang diluluskan Kerajaan BN dahulu di kawasan pendalaman seperti kawasan P220 Baram seperti simpang jalan ke simpang Long Tungan Baram, Long Lellang Baram dan Tanjong Tepalit/ Long Selatong Baram.

**JAWAPAN**

Tuan Yang di-Pertua,

Untuk makluman Yang Berhormat, Projek Jalan Balak Negeri Sarawak (Fasa 4): Bahagian Miri telah diluluskan di bawah Rolling Plan Pertama, Rancangan Malaysia Kesebelas (RP1, RMKe-11) dengan kos keseluruhan berjumlah RM70.6 juta. Skop kerja bagi projek ini adalah menaiktaraf jalan balak sepanjang 199.6km. Dalam keseluruhan jajaran ini, sepanjang 190.0km terletak di dalam kawasan parlimen Baram dengan kos projek berjumlah RM66.39 juta.

Status semasa projek ini adalah sedang dalam proses perlantikan perunding secara tender terbuka. Projek ini dijangka akan dapat ditender pada bulan Februari 2021 setelah proses rekabentuk siap.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN R. SIVARASA [ SUNGAI BULOH ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan sama ada Kementerian mempunyai satu "database" yang lengkap untuk Sabah dan Sarawak untuk semua kampung-kampung di bawah Kementerian berkenaan status bekalan api dan bekalan air dan status jalan dan akses kepada kemudahan jalur lebar. Apakah rancangan Kementerian berkenaan perkara ini.

**JAWAPAN**

Tuan Yang di-Pertua,

Untuk makluman Yang Berhormat, Kementerian mempunyai "database" bagi program-program pembangunan di bawah Kementerian yang menggunakan peruntukan pembangunan Kementerian termasuk program Bekalan Elektrik Luar Bandar (BELB), Bekalan Air Luar Bandar (BALB), Jalan Luar Bandar (JALB) dan Jalan Perhubungan Desa (JPD). Data-data tersebut turut diterbitkan di dalam Buku Data Asas KPLB secara tahunan yang juga meliputi data bilangan rumah dan bilangan penerima faedah bagi program-program tersebut mengikut negeri.

Walau bagaimanapun, pihak Kementerian tidak mempunyai "database" bagi kemudahan jalur lebar di luar bandar.

**NO. SOALAN : 35**

Selain itu, terdapat juga agensi-agensi Kerajaan lain yang mengeluarkan data yang berkaitan termasuk :

- a) Data Peratusan Isi Rumah Mengikut Jenis Bekalan Air dan Kemudahan Bekalan Elektrik mengikut negeri dan strata melalui Laporan Penyiasatan Pendapatan Isi Rumah Dan Kemudahan Asas oleh Jabatan Perangkaan Malaysia (DOSM);
- b) Data Liputan Bekalan Elektrik dan Liputan Bekalan Air mengikut negeri, daerah dan mukim melalui Banci Penduduk dan Perumahan Malaysia oleh Jabatan Perangkaan Malaysia (DOSM); dan
- c) Data Liputan Bekalan Air Mengikut Negeri dan Strata Malaysia oleh Suruhanjaya Perkhidmatan Air Negara (SPAN)

Memandangkan pembekalan elektrik, air, jalan dan akses kepada kemudahan jalur lebar di luar bandar melibatkan pelbagai kementerian dan agensi persekutuan dan negeri, Kementerian bersedia untuk bekerjasama dengan mana-mana kementerian, agensi pusat dan negeri termasuk Sabah dan Sarawak untuk melengkapkan "database" yang berkaitan dengan perkara-perkara di bawah tanggungjawab Kementerian.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KE TIGA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB DATO' MASIR KUJAT [SRI AMAN]**

**TARIKH : 20 JULAI 2020 ( ISNIN )**

**SOALAN**

**DATO' MASIR KUJAT [ SRI AMAN ]** minta **MENTERI DALAM NEGERI** menyatakan sama ada Kementerian ada statistik kes tangkapan penyeludupan seperti dadah atau PATI sepanjang Perintah Kawalan Pergerakan dari bulan Mac sehingga kini di sempadan Sri Aman/ Kalimantan Barat.

**JAWAPAN**

Tuan Yang Di-pertua,

Kementerian Dalam Negeri (KDN) melalui agensi-agensi penguatkuasaan KDN sentiasa proaktif dalam usaha mengekang aktiviti pengedaran dadah atau penyeludupan pendatang asing tanpa izin (PATI) di seluruh negara termasuk di kawasan sempadan negara. Meskipun dilanda wabak Covid-19 pada ketika ini, ianya tidak akan sesekali mematahkan usaha kementerian dalam mengekang aktiviti pengedaran dadah atau penyeludupan pendatang asing tanpa izin (PATI).

Sepanjang tempoh pelaksanaan Perintah Kawalan Pergerakan (PKP), Perintah Kawalan Pergerakan Bersyarat (PKPB) dan Perintah Kawalan Pergerakan Pemulihan (PKPP) iaitu bermula 18 Mac 2020 sehingga 31 Ogos 2020 di dalam kawasan Sri Aman, Sarawak, pihak PDRM telah berjaya menumpaskan sebanyak 2 kes aktiviti pengedaran dadah melibatkan 3 tangkapan. Selain itu, berdasarkan maklumat operasi daripada JIM pula, sepanjang tempoh PKP mulai 18 Mac sehingga 3 Julai, sebanyak 259 tangkapan PATI telah dilakukan. Walau bagaimanapun, tiada kes penyeludupan dadah dan PATI melalui sempadan Sri Aman/ Kalimantan Barat yang direkodkan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB TUAN M. KULASEGARAN [ IPOH BARAT ]**

**TARIKH : 20 JULAI 2020 (ISNIN)**

**SOALAN**

**TUAN M. KULASEGARAN [ IPOH BARAT ]** minta **MENTERI SUMBER MANUSIA** menyatakan :-

- (a) Sebab Pembangunan Sumber Manusia Berhad (HRDF) melonggarkan permohonan penyedia latihan sebelum pelancaran inisiatif walaupun terdapat ribuan pelabur serta kepada sesiapa yang telah mengekalkan lesen selama bertahun-tahun dan apakah kriteria yang telah ditetapkan untuk mengeluarkan lesen baru; dan
- (b) jumlah lesen yang dikeluarkan sebelum dan selepas Mac 2020.

**JAWAPAN**

**Tuan Yang di-Pertua,**

1. Syarat permohonan untuk menjadi sebuah Penyedia Latihan berdaftar dengan Pembangunan Sumber Manusia Berhad (PSMB) adalah sama seperti sebelumnya iaitu mereka yang memohon untuk menjadi pihak penyedia latihan mesti mempunyai syarikat yang berdaftar dengan Suruhanjaya Syarikat Malaysia dan dalam pendaftaran syarikatnya mesti tertera dalam perlembagaan syarikat bahawa mereka akan terlibat dengan perniagaan penyediaan latihan. Selain daripada itu, mereka juga dikehendaki mempunyai jurulatih yang mempunyai pengiktirafan sebagai jurulatih HRDF terlatih atau '*TTT registered*' (*Train-the-Trainer certified*), bagi mereka yang tidak mempunyai jurulatih yang didaftar sebagai '*TTT HRDF certified*' tetapi mereka mempunyai jurulatih yang mempunyai kemahiran dalam sesuatu bidang serta pengalaman luas dalam bidang latihan, mereka boleh memohon untuk pelepasan dan permohonan mereka akan diteliti oleh sebuah jawatankuasa dalaman HRDF yang mempunyai kemahiran dalam bidang latihan.

**Tuan yang di-Pertua,**

2. Memandangkan negara sedang dalam proses pemulihan selepas dilanda oleh wabak Covid19 dan masalah ekonomi global yang mencabar, kerajaan Malaysia telah mempertanggungjawabkan PSMB sebagai sebuah agensi kerajaan yang mempunyai kepakaran mengurus latihan kemahiran untuk membantu syarikat-syarikat yang terkesan dengan cabaran ekonomi global dan negara yang terkesan bangun dan menyahut cabaran untuk menyediakan diri mereka dengan memastikan mereka bersedia untuk menghadapi sebarang cabaran yang akan dihadapi oleh syarikat pada masa hadapan. PSMB diberi tanggungjawab untuk memastikan bahawa rakyat Malaysia yang mampu bekerja mempunyai latihan yang secukupnya untuk terus bekerja dengan majikan sedia ada serta membantu pekerja baru mempunyai kemahiran yang diperlukan oleh syarikat-syarikat yang masih menawarkan peluang pekerjaan pada masa ini.

3. PSMB menerima banyak permohonan dari syarikat-syarikat kecil dan sederhana untuk mendapat latihan kemahiran dalam bidang pilihan tertentu untuk meningkatkan produktiviti syarikat melalui latihan untuk pekerja sedia ada serta keperluan latihan kemahiran untuk pekerja baharu. PSMB tidak menghalang syarikat-syarikat ini daripada memilih latihan kemahiran yang diperlukan syarikat serta memberi mereka kebebasan untuk memilih kursus yang disediakan oleh penyedia latihan pilihan mereka kerana mereka lebih arif mengenai keperluan syarikat mereka sendiri. Bagi penyedia latihan yang mempunyai kemahiran latihan serta memenuhi semua syarat PSMB, permohonan untuk menjadi penyedia latihan HRDF dipercepatkan supaya mereka dapat memenuhi keperluan negara yang telah menetapkan bahawa dalam keadaan ekonomi yang makin mencabar ini semua syarikat diberi bantuan untuk terus beroperasi dan pulih secepat mungkin. Pemulihan ini penting supaya rakyat Malaysia yang mempunyai pekerjaan akan tetap mempunyai pekerjaan yang terjamin dan syarikat yang cepat pulih pula boleh terus mengambil pekerja baru dan lebih ramai rakyat Malaysia akan mempunyai peluang pekerjaan. Ini termasuk bagi pekerja Malaysia yang hilang pekerjaan dapat mencari pekerjaan baru.

**Tuan yang dipertua,**

4. Ingin saya tegaskan di sini bahawa PSMB akan memastikan semua penyedia latihan tidak kira mereka yang dah lama menjadi penyedia latihan atau mereka yang baru berdaftar kerana mempunyai kemahiran yang diperlukan syarikat, kesemua mereka akan diberi peluang jika layak untuk mengambil bahagian dalam program Penjana HRDF yang dikendalikan oleh PSMB. Ini adalah untuk memastikan kejayaan perlaksanaan inisiatif Penjana HRDF. Untuk membantu Penyedia Latihan yang sedia ada, PSMB telah bertindak secara proaktif dengan memperkenalkan struktur yuran baharu yang lebih rendah kosnya berbanding sebelum wabak Covid-19 melanda negara yang menjejaskan perniagaan syarikat-syarikat kecil dan sederhana. PSMB kini membenarkan bayaran yuran bagi Penyedia Latihan sebanyak RM1,000.00 untuk tempoh satu (1) tahun berbanding sebelum ini yang mana Penyedia Latihan terpaksa membayar RM3,000.00 sekali gus



untuk tempoh tiga (3) tahun. Struktur yuran ini terpakai untuk Penyedia Latihan yang mengemukakan permohonan sebelum 31 Disember 2020.

5. PSMB turut melanjutkan tempoh lesen Penyedia Latihan yang tamat dalam tempoh 1 Mei 2020 hingga 30 April 2021 sehingga 1 Mei 2021. Ini termasuk Penyedia Latihan yang telah tamat tempoh tetapi tidak lebih dari 6 bulan untuk melakukan pembaharuan sehingga 1 Mei 2020. Oleh yang demikian, jumlah lesen yang dikeluarkan termasuk yang telah dilanjutkan adalah sebanyak 2,066 Penyedia Latihan iaitu dari 1 Disember 2019 sehingga 30 April 2021. Peratusan pendaftaran penyedia latihan baru sejak Mac 2020 tidak lebih dari 30% dari jumlah keseluruhan.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN AHMAD JOHNNIE BIN ZAWAWI  
[ IGAN ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan berapa unit rumah yang telah dibina di bawah Program Perumahan Rakyat Termiskin (PPRT) di kawasan Parlimen P.207 Igan sejak tahun 2015-2020 serta berapa jumlah permohonan yang diterima berbanding jumlah yang diluluskan. Apakah pihak Kementerian bercadang untuk menambah kuantiti rumah PPRT pada masa akan datang memandangkan ramai yang memohon.

**JAWAPAN**

Tuan Yang di-Pertua,

Untuk makluman Yang Berhormat, jumlah rumah yang telah dibina di bawah Program Perumahan Rakyat Termiskin (PPRT) di kawasan Parlimen P.207 Igan bagi tahun 2015 hingga 2019 adalah 102 Bina Baharu dan 463 Baik Pulih.

Jumlah permohonan PPRT terkumpul setakat suku tahun pertama 2020 yang diterima melalui sistem Bank Data Kemiskinan Nasional (e-Kasih) adalah berjumlah 7,223 bagi keseluruhan negeri Sarawak.

Pertambahan bilangan bantuan rumah PPRT bergantung kepada kelulusan peruntukan tahunan yang diluluskan untuk program ini. Untuk tahun 2020, keseluruhan peruntukan untuk PPRT bagi Negeri Sarawak berjumlah RM44.03 juta bagi projek bina baru dan RM 26.42 juta untuk baik pulih. Selain itu, terdapat pertambahan sebanyak RM25 juta lagi peruntukan untuk projek baik pulih rumah di Negeri Sarawak di bawah Pakej Rangsangan Ekonomi Prihatin (PRE PRIHATIN).

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB TUAN STEVEN CHOONG SHIAU YOON  
[ TEBRAU ]**

**TARIKH : 20 JULAI 2020 (ISNIN)**

**TUAN STEVEN CHOONG SHIAU YOON [ TEBRAU ]** minta **MENTERI SUMBER MANUSIA** menyatakan jumlah pekerja asing yang ada di negara kita setakat ini berdasarkan sektor yang mereka berada dan kewarganegaraan. Apakah pengubahsuaian akan dibuat dalam dasar pengambilan pekerja asing berikutan kesan pandemik COVID-19.

**JAWAPAN**

Tuan Yang di-Pertua,

1. Berdasarkan kepada statistik Jabatan Imigresen Malaysia sehingga 30 April 2020, jumlah pekerja asing yang berdaftar dan dikeluarkan Pas Lawatan Kerja Sementara (PLKS) adalah 1,746,817 orang. Perincian mengikut sektor dan kewarganegaraan adalah seperti berikut:

NEGARA	SEKTOR							JUMLAH
	Pembuatan	Pembinaan	Perladangan	Perkhidmatan	Pertanian	Pembantu Rumah	Lombong & Kuari	
Indonesia	115,995	127,660	171,227	36,784	68,711	84,023	4	604,404
Bangladesh	174,469	184,318	25,014	80,880	16,232	119	9	481,041
Nepal	182,186	5,461	2,634	66,434	7,696	56	5	264,472
Myanmar	124,532	10,979	799	16,176	3,893	53	49	156,481
India	2,595	7,408	28,134	42,834	14,620	1,179	-	96,770
Pakistan	5,403	19,846	4,079	8,654	13,888	24	-	51,894
Filipina	3,472	2,361	3,331	5,169	3,662	29,215	-	47,210

Thailand	121	363	307	9,505	969	278	-	11,543
Vietnam	9,389	1,246	39	1,613	425	847	-	13,559
China	1,189	5,452	8	3,985	7	200	31	10,872
Sri Lanka	3,762	212	110	1,139	107	521	-	5,851
Cambodia	677	83	69	376	246	1,223	-	2,674
Lao PDR	6	-	-	7	2	25	-	40
Uzbekistan	-	-	-	3	-	2	-	5
Turkmenistan	-	-	-	-	-	1	-	1
<b>JUMLAH</b>	<b>623,796</b>	<b>365,389</b>	<b>235,751</b>	<b>273,559</b>	<b>130,458</b>	<b>117,766</b>	<b>98</b>	<b>1,746,817</b>

2. Untuk makluman Yang Berhormat, Kerajaan pada masa ini telah membekukan pengambilan pekerja asing baharu mengambil kira penularan wabak pandemik COVID-19 yang memberi implikasi yang besar kepada pasaran pekerjaan negara. Kerajaan juga lebih cenderung ke arah mengambil pendekatan “*all out*” bagi memastikan pencari kerja warganegara diserapkan dalam pasaran pekerjaan bagi mengurangkan kadar pengangguran dan menjamin kelangsungan hidup rakyat khususnya yang terkesan akibat pandemik tersebut. Selain itu, Kerajaan juga telah mewajibkan pengiklanan kekosongan jawatan untuk tempoh tidak kurang dari 30 hari di Portal JobsMalaysia bagi tujuan pengambilan pekerja asing dan pegawai dagang. Sekiranya tiada pengisian dari kalangan pencari kerja tempatan dalam tempoh tersebut, barulah majikan dibenarkan membuat permohonan pengambilan pekerja asing dan pegawai dagang. Inisiatif ini telah bermula pada 1 Julai 2020;

3. Berhubung dengan isu pekerja asing sedia ada dalam negara yang terkesan akibat pandemik ini, Kerajaan bermula 10 Jun 2020 telah menjalankan program pertukaran majikan bagi membolehkan majikan yang tidak dapat meneruskan penggajian pekerja asing mereka untuk menyerahkan pekerja-pekerja tersebut kepada majikan baharu (*redeployment*) dalam sektor yang sama. Proses ini dikendalikan sepenuhnya oleh Jabatan Tenaga Kerja Semenanjung Malaysia dan Kementerian Dalam Negeri. Pada masa yang sama, Kerajaan juga sedang meneliti pelbagai aspek dalam menambah baik pengurusan pengambilan pekerja asing secara holistik.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB PUAN NATRAH BT. ISMAIL (SEKIJANG)**

**TARIKH : 20 JULAI 2020 ( ISNIN )**

**SOALAN**

**PUAN HAJAH NATRAH BINTI ISMAIL [ SEKIJANG ]** minta **MENTERI DALAM NEGERI** menyatakan jumlah kes kematian bagi kanak-kanak bawah 18 tahun dalam tahanan imigresen sejak tahun 2015 sehingga Januari 2020.

**JAWAPAN**

Tuan Yang Di Pertua,

Untuk makluman Yang Berhormat, jumlah kes kematian bagi tahanan kanak-kanak yang berusia bawah 18 tahun di Depot Tahanan Imigresen sejak tahun 2015 sehingga 31 Januari 2020 adalah seramai dua orang. Satu kes kematian kanak-kanak lelaki dilaporkan pada tahun 2018 di mana punca kematian tersebut adalah disebabkan oleh jangkitan kuman pada paru-paru semasa lahir (*Septic Shock Secondary Pneumonia with Persistent Pulmonary Hypertension in Newborn*).

Manakala satu lagi kematian yang melibatkan seorang kanak-kanak lelaki adalah berpunca daripada jangkitan kuman pada usus semasa lahir (*Extensive Necrotising Enterocolitis*) yang dilaporkan pada tahun 2020.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN AKMAL NASRULLAH B. MOHD NASIR  
(JOHOR BAHRU)**

**TARIKH : 20 JULAI 2020 ( ISNIN )**

**SOALAN**

**TUAN AKMAL NASRULLAH BIN MOHD. NASIR [ JOHOR BAHRU ]** minta  
**MENTERI DALAM NEGERI** menyatakan :-

(a) status operasi membanteras golongan pendatang asing tanpa izin (PATI) dengan menghantar mereka pulang ke negara asal ketika krisis COVID-19 ;  
dan

(b) berapa jumlah bilangan PATI yang masih ada di negara ini.

**JAWAPAN**

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) melalui Jabatan Imigresen Malaysia (JIM) sentiasa komited dalam memastikan keselamatan negara diutamakan dengan melaksanakan operasi penguatkuasaan bersepadu secara berterusan bagi membanteras kehadiran Pendatang Asing Tanpa Izin (PATI) di negara ini.

Operasi penguatkuasaan tersebut dilaksanakan dengan kerjasama agensi penguatkuasa lain terutamanya Polis Diraja Malaysia (PDRM) dan Agensi Penguatkuasaan Maritim Malaysia (APMM) di lokasi-lokasi yang dikenal pasti menjadi tumpuan warganegara asing. JIM juga turut melibatkan

**NO.SOALAN : 41**

Kerajaan Negeri melalui Pihak Berkuasa Tempatan (PBT) dan Majlis Pengurusan Komuniti Kampung (MPKK) / Jawatankuasa Kemajuan dan Keselamatan Kampung (JKKK) serta persatuan penduduk dalam menyalurkan maklumat keberadaan PATI dalam menangani masalah PATI secara holistik.

Untuk makluman Ahli Yang Berhormat, sebanyak 59,946 operasi telah dijalankan oleh JIM dengan tangkapan seramai 191,632 orang PATI dan 5,484 orang majikan pada tahun 2016 hingga 2019.

Dari 1 Januari hingga 2 Julai 2020 pula, JIM telah melaksanakan 4,301 operasi yang melibatkan pemeriksaan 68,033 orang warganegara asing. Hasilnya, seramai 17,473 orang PATI dan 250 orang majikan telah diambil tindakan undang-undang. Daripada jumlah tersebut, warganegara Indonesia mencatatkan jumlah tangkapan yang tertinggi iaitu 6,514 dan diikuti oleh warganegara Bangladesh seramai 2,964 orang dan bakinya adalah warganegara Filipina, Myanmar, Thailand dan lain-lain.

Sepanjang tempoh pelaksanaan Perintah Kawalan Pergerakan (PKP) bermula dari 18 Mac 2020 sehingga 1 Julai 2020, jumlah penghantaran pulang tahanan yang berada di Depot Tahanan Imigresen adalah seramai 5,951 orang.

Pecahan tahanan yang dihantar pulang mengikut warganegara adalah seperti berikut :

<b>Bil.</b>	<b>Warganegara</b>	<b>Jumlah (orang)</b>
1.	Indonesia	4,110
2.	Thailand	637
3.	Myanmar	391
4.	Pakistan	380
5.	Bangladesh	279
6.	China	73
7.	India	26
8.	Sri Lanka	11
9.	Lain-lain	44



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB TUAN M. KULASEGARAN [ IPOH BARAT ]**

**TARIKH : 20 JULAI 2020 (ISNIN)**

**SOALAN**

**TUAN M. KULASEGARAN [ IPOH BARAT ]** minta **MENTERI SUMBER MANUSIA** menyatakan anggaran pekerja yang hilang pekerjaan akibat pandemik COVID-19 dan strategi yang diguna pakai oleh pihak Kementerian untuk menangani pengangguran tersebut.

**JAWAPAN**

Tuan Yang di-Pertua,

1. Penularan wabak pandemik Covid-19 bukan sahaja menyebabkan krisis kepada kesihatan awam, malah kepada ekonomi dan pasaran tenaga kerja keseluruhannya. Dalam tempoh Perintah Kawalan Pergerakan yang bermula pada 18 Mac dan sehingga sekarang pelaksanaan arahan-arahan pematuhan prosedur pencegahan penularan Covid-19, majoriti pekerjaan terutamanya yang bergantung kepada interaksi kepada pelanggan secara fizikal turut terkesan. Secara umumnya terdapat rantai ekonomi yang terjejas dengan penularan wabak Covid-19 di seluruh dunia dan turut menjejaskan kitaran ekonomi negara dengan penutupan sebahagian operasi dan penutupan sepenuhnya syarikat yang terjejas.

2. Berdasarkan laporan majikan melalui Borang Pemberhentian Pekerja (Borang PK) yang dilaporkan kepada Jabatan Tenaga Kerja (JTK). Laporan yang diwajibkan untuk dikemukakan kepada JTK tidak meliputi perincian umur, kaum dan status perkahwinan. Jumlah keseluruhan yang terlibat dengan pemberhentian iaitu sebanyak 1,377 majikan dengan 36,196 orang pekerja. Pemberhentian Tetap (*Permanent Retrenchment*) melibatkan seramai 28,779 orang pekerja manakala seramai 7,417 orang pemberhentian secara Pemberhentian Sukarela (*Voluntary Separation Scheme*). Jumlah pekerja yang diberhentikan pada bulan Mac 2020 adalah 1,791 orang, pada bulan April seramai 4,127 orang, pada bulan Mei seramai 7,195 orang, jumlah tersebut meningkat kepada seramai 19,352 orang pada Jun 2020.

3. Secara umum, pemberhentian pekerja adalah di bawah prerogatif majikan. Ia adalah hak setiap majikan untuk menstrukturkan atau menyusun semula perniagaan atau organisasinya bagi memperolehi keuntungan yang baik dan untuk mengelakkan atau mengurangkan kerugian kerana penstrukturkan, pengurangan, penggabungan, perubahan teknologi, kelembapan ekonomi, bencana alam atau penularan wabak. Sekiranya penyusunan semula itu menyebabkan lebih tenaga kerja

sebarang tindakan untuk mengimbangi lebihan tersebut adalah sah dari segi undang-undang.

4. Jika mana-mana perniagaan atau organisasi ingin memberhentikan pekerja, majikan mesti mematuhi keperluan ini bagi memastikan proses itu dilakukan dengan adil:

- Harus ada kesan kewangan yang tulen terhadap perniagaan kerana tempoh arahan PKP Covid-19.
- Majikan mesti terlebih dahulu menggunakan cara lain sebelum membuat keputusan untuk memberhentikan pekerja seperti mengurangkan atau menyekat pengambilan pekerja baru, mengurangkan atau mengehadkan kerja lebih masa, mengurangkan waktu kerja, mengehadkan pekerja dari bekerja pada hujung minggu atau cuti umum, melakukan pemberhentian kerja sementara atau mengurangkan gaji pekerja.
- Jika pemberhentian pekerjaan tidak dapat dielakkan, majikan hendaklah terlebih dahulu menamatkan pekerja warga asing sebelum mempertimbangkan pekerja tempatan (*First Foreign Workers*).
- Apabila mempertimbangkan pemberhentian pekerja tempatan, majikan digalakkan mematuhi kaedah "*Last In First Out*" \*(*LIFO*).

5. Walau bagaimanapun, majikan dinasihatkan untuk melakukan pengurangan gaji sebagai langkah untuk mengelakkan daripada memberhentikan pekerja. Dan apa-apa bentuk pengurangan gaji perlu dirunding dan mendapat persetujuan pihak pekerja terlebih dahulu. Ini kerana pengurangan gaji tanpa persetujuan daripada pihak pekerja akan dilihat sebagai pelanggaran kontrak yang mungkin mengakibatkan tuntutan pemecatan yang tidak adil.

6. Di bawah Seksyen 20 Akta Perhubungan Perusahaan tahun 1967, seseorang pekerja yang merasa bahawa dia telah diberhentikan kerja secara tidak adil tanpa sebab atau alasan yang adil oleh majikannya, maka pekerja berkenaan boleh mengemukakan aduannya kepada Ketua Pengarah Jabatan Perhubungan Perusahaan dalam tempoh masa 60 hari dari tarikh penamatan kerja.

7. Keadaan 'normal baru' menyebabkan kadar pengambilan pekerjaan dilaporkan semakin berkurangan. peluang pekerjaan yang wujud pada tahun ni akan lebih sedikit dan kadar pengangguran akan meningkat. "*MIER (Malaysia Institute of Economic Research)* menganggarkan sebanyak 2.4 juta akan kehilangan pekerjaan. Berdasarkan data dan keadaan ekonomi semasa peluang pekerjaan untuk enam bulan akan datang agak terhad. Rakyat sukar untuk memilih pekerjaan. *Federation of Malaysian Manufacturers (FMM)*, sebuah persekutuan pengilang-pengilang menyatakan bahawa besar kemungkinan 63 peratus ahli-ahli mereka akan membuang pekerja-pekerja akibat wabak Covid-19 dan perintah kawalan pergerakan (PKP) yang dilanjutkan. Sebanyak 47 peratus pengilang-pengilang tersebut akan berbuat demikian dalam tempoh tiga hingga enam bulan akan datang. Manakala *The Malaysian Employers Federation (MEF)*, sebuah persekutuan majikan-majikan menjangkakan kira-kira satu juta pembuangan pekerja berlaku pada tahun ini.

8. KSM melalui Jabatan Tenaga Kerja (JTK) telah merangka pelbagai program dan telah dilaksanakan untuk membantu para pencari kerja termasuklah para belia dan pekerja diberhentikan. Antara program-program yang telah dilaksanakan ialah penganjuran temu duga terbuka mengikut standard prosedur norma baharu yang telah ditetapkan. Ia bertujuan sebagai platform bagi para pencari kerja dan majikan untuk bertemu dan mendapatkan pekerjaan dan calon pekerja yang sesuai dengan kehendak mereka.

9. Pemadanan pekerjaan melalui Portal *JobsMalaysia* secara dalam talian" akan menikmati kemudahan secara interaktif dan memaparkan pilihan jawatan yang ditawarkan oleh majikan. Penganjuran

Karnival Kerjaya di Pusat *JobsMalaysia* seluruh negara menawarkan kekosongan jawatan daripada pelbagai latar belakang majikan. Kerjasama majikan-majikan yang menawarkan kekosongan pekerjaan dan Agensi-agensi Pekerjaan Swasta (APS) melalui Program temu duga terbuka ini dilaksanakan pada setiap minggu di Pusat *JobsMalaysia* seluruh negara.

10. KSM megesa agar mana-mana pencari kerja baru atau pencari kerja yang berhasrat untuk meningkatkan kerjaya dan warganegara yang kehilangan pekerjaan mendaftar dengan *JobsMalaysia* dan PERKESO. Di bawah Sistem Insurans Pekerjaan (SIP), pekerja yang hilang pekerjaan layak menuntut faedah berbentuk bantuan kewangan sementara, carian pekerjaan, penempatan pekerjaan, kaunseling kerjaya, program latihan dan sebagainya tertakluk kepada kelayakan di bawah Akta 800. Bagi majikan-majikan yang mempunyai kekosongan pekerjaan menggunakan platform yang disediakan oleh kerajaan bagi memperolehi insentif pengambilan pekerjaan tempatan di bawah Pelan Jana Semula Ekonomi Negara (PENJANA). Insentif pengambilan pekerja merangkumi bantuan kewangan untuk majikan lepasan sekolah, siswazah, penganggur dan pekerja yang diberhentikan kerja serta perantis.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB DATO' ABDULLAH SANI BIN ABDUL HAMID  
[ KAPAR ]**

**TARIKH : 20 JULAI 2020 (ISNIN)**

**SOALAN**

**DATO' ABDULLAH SANI BIN ABDUL HAMID [ KAPAR ]** minta **MENTERI SUMBER MANUSIA** menyatakan statistik terkini jumlah kutipan Skim Insuran Pekerja (SIP) dan berapa jumlah yang telah diagihkan kepada yang layak menerima.

**JAWAPAN**

Tuan Yang di-Pertua,

1. Untuk makluman Dewan Yang Mulia ini, Kementerian Sumber Manusia melalui PERKESO sentiasa memantau keadaan pemberhentian pekerja negara. Berdasarkan rekod Sistem Insurans Pekerjaan (SIP) berhubung dengan kes kehilangan pekerjaan adalah seperti berikut:

**Statistik Kehilangan Pekerjaan (*Loss of Employment-LOE*)**

<b>Tahun</b>	<b>Kehilangan Pekerjaan (<i>Loss of Employment-LOE</i>)</b>
2018	23,697
2019	40,084
2020	50,825 (sehingga 1 Julai 2020)

**Sektor-Sektor Yang Terlibat Pemberhentian Pekerja**

2. Jumlah rakyat Malaysia yang hilang pekerjaan akibat dari pandemik COVID-19 setakat 1 Julai 2020 adalah sebanyak 50,825 orang. Pecahan mengikut sektor-sektor pekerjaan yang terlibat adalah seperti berikut:

- Sektor Pembuatan sebanyak 11,432 atau 23%.
- Sektor Penginapan dan Aktiviti Perkhidmatan Makanan dan Minuman sebanyak 7,497 atau 15%.
- Sektor Perdagangan Borong dan Runcit sebanyak 7,129 atau 14%.
- Aktiviti Profesional, Saintifik dan Teknikal sebanyak 4,546 atau 9%.

**Insurans Pekerjaan (SIP)**

3. Statistik jumlah pekerja mencarum di bawah Sistem Insurans Pekerjaan pada tahun 2018, 2019 dan 2020 adalah seperti berikut;

Tahun	Pekerja Mencarum
2018	6.1 juta
2019	6.9 juta
2020	6.4 juta (Sehingga Mei 2020)

Manakala jumlah kutipan caruman di bawah Sistem Insurans Pekerjaan (SIP) pada tahun 2018 berjumlah RM560.8 juta dan RM651.6 juta pada tahun 2019. Sehingga April 2020, sejumlah RM 225.4 juta telah diterima.

4. Berhubung tuntutan dan bayaran faedah SIP pada tahun 2018 sebanyak RM17.2 juta bayaran faedah SIP yang melibatkan sebanyak 28,550 tuntutan faedah telah dibuat. Manakala bagi tahun 2019, sebanyak 66,650 tuntutan faedah melibatkan bayaran sebanyak RM107.6 juta. Pada tahun ini sehingga 26 Jun 2020, sebanyak RM107.8 juta bayaran faedah SIP telah dibuat iaitu melibatkan sebanyak 66,204 tuntutan faedah.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' ABDULLAH SANI  
BIN ABDUL HAMID [ KAPAR ]**

**TARIKH : 20 JULAI 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan langkah yang diambil untuk membanteras **kilang-kilang haram** yang merugikan pendapatan negara.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) memandang serius kewujudan kilang-kilang yang beroperasi secara haram dan merugikan pendapatan negara. Pihak Berkuasa Tempatan (PBT) mempunyai kuasa di bawah Akta Jalan, Parit dan Bangunan (Akta 133) dan Akta Perancangan Bandar dan Desa 1976 (Akta 172) untuk mengambil tindakan dalam membanteras kewujudan kilang haram.
2. Di bawah Seksyen 72, Akta 133, Yang Dipertua (YDP) bagi sesuatu PBT mempunyai kuasa untuk meruntuh atau memindahkan

bangunan yang tidak dibenarkan. Manakala di bawah Seksyen 19 (1), Akta 172, terdapat peruntukan undang-undang yang melarang pemajuan tanpa kebenaran merancang di dalam kawasan operasi PBT. Peruntukan yang terdapat di dalam kedua-dua Akta ini jelas memberikan kuasa kepada PBT untuk mengambil tindakan dalam membanteras kewujudan kilang haram.

3. Untuk makluman Ahli Yang Berhormat juga, antara langkah-langkah lain yang diambil oleh PBT untuk membendung masalah kilang haram ini adalah seperti berikut:

- a) Melaksanakan operasi penguatkuasaan bersepadu bersama Polis Diraja Malaysia (PDRM), Jabatan Imigresen Malaysia (JIM), Jabatan Alam Sekitar (JAS), Tenaga Nasional Berhad (TNB) dan Suruhanjaya Perkhidmatan Air (SPAN);
- b) Melaksanakan tindakan penguatkuasaan dengan mengeluarkan Notis Pemberhentian dan Kompaun di bawah Undang-Undang Kecil Pelesenan Tred, Perniagaan dan Perindustrian dan di bawah Seksyen 44(1)(D) Akta Jalan Parit Dan Bangunan 1974 bagi kesalahan kacau ganggu.

4. PBT juga mewujudkan pasukan *task force* penguatkuasaan kilang haram bagi menjalankan tindakan penguatkuasaan, membuat pemantauan dan pemeriksaan terhadap kilang yang tidak mempunyai lesen dan berlesen untuk memastikan mereka tidak melanggar syarat-syarat pelesenan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS  
TAHUN 2020**

**PERTANYAAN : LISAN**

**DARIPADA : YB DATO' SERI TIONG KING SING [ BINTULU ]**

**TARIKH : 20 JULAI 2020 (ISNIN)**

**SOALAN**

**DATO' SERI TIONG KING SING [ BINTULU ]** minta **MENTERI SUMBER MANUSIA** menyatakan :-

- (a) apakah tindakan penguatkuasaan Kementerian terhadap salah laku agensi pekerja asing yang begitu serius; dan
- (b) apakah jaminan kepada majikan pembantu rumah asing yang sering diketepikan.

**JAWAPAN**

Tuan Yang di-Pertua,

1. Kerajaan telah membuat pindaan ke atas Akta Agensi Pekerjaan Swasta 1981 (Pindaan 2017) (Akta 246) berkuatkuasa 1 Februari 2018. Rang undang-undang pindaan tersebut bertujuan untuk memodenkan dan menambah baik peruntukan sedia ada berkaitan agensi pekerjaan swasta agar ia selaras dengan keperluan semasa Akta dikuatkuasakan oleh Kementerian Sumber Manusia (KSM) melalui Jabatan Tenaga Kerja (JTK).
2. Ciri-ciri utama pindaan tersebut meliputi perkara-perkara antara lain bagi memperluaskan peranan Agensi Pekerjaan Swasta (APS) untuk

meliputi urusan merekrut dan menempatkan para pekerja bukan warganegara termasuk pekhidmat domestik asing selain daripada urusan merekrut dan menempatkan para pencari kerja warganegara. Pindaan tersebut juga melibatkan pengklasifikasian pengeluaran lesen sedia ada kepada tiga kategori lesen iaitu Lesen A untuk merekrut pekerja warganegara bagi penempatan di dalam Malaysia, Lesen B untuk merekrut pencari kerja warganegara bagi penempatan pekerjaan di dalam dan di luar Malaysia serta pekhidmat domestik asing di dalam Malaysia. Manakala, Lesen C dikhususkan untuk merekrut dan menempatkan para pencari kerja warganegara di dalam dan luar Malaysia serta menempatkan pekerja bukan warganegara termasuk pekhidmat domestik asing ke dalam pekerjaan dengan para majikan dalam negara.

3. Sekiranya terdapat sebarang pelanggaran atau kesalahan oleh APS di bawah Akta 246, terdapat beberapa tindakan yang boleh diambil seperti berikut:

**i. Penggantungan atau pembatalan lesen (Seksyen 11A)**

Penggantungan atau pembatalan lesen APS boleh dilakukan oleh Ketua Pengarah Tenaga Kerja jika didapati bahawa APS telah melakukan:

- Melanggar atau tidak mematuhi mana-mana peruntukan Akta atau peraturan-peraturan di bawah Akta;
- Tidak mematuhi mana-mana syarat yang dikenakan oleh Ketua Pengarah;
- Telah disabitkan kesalahan di bawah Akta 246 atau pengarah APS ditahan di bawah mana-mana undang-undang berkaitan antipemerdagangan orang dan buruh paksa;
- Telah digulungkan atau selainnya dibubarkan;
- Tidak mematuhi apa-apa arahan bertulis yang dikeluarkan oleh Ketua Pengarah di bawah Akta 246;
- Telah mendorong pengeluaran lesen dengan representasi palsu tentang fakta;

- Telah menggunakan lesen yang diberikan bagi tujuan menyalahi undang-undang; atau
- Berhenti menjalankan aktiviti merekrut.

**ii. Pencairan wang jaminan (Seksyen 14D)**

Tujuan wang jaminan diperkenalkan adalah sebagai cagaran untuk membantu pencari kerja, pekerja bukan warganegara dan majikan sekiranya mereka menjadi mangsa kepada penipuan, pemerdayaan atau eksploitasi oleh APS. Keperluan mendepositkan wang jaminan juga bertujuan untuk memastikan hanya syarikat yang benar-benar komited sahaja yang memohon lesen dan menjalankan operasi sebagai APS.

Sehubungan itu, sekiranya APS gagal menjalankan tanggungjawab kepada pencari kerja, pekerja bukan warganegara atau majikan maka wang jaminan APS tersebut boleh dicairkan. Contohnya sekiranya terdapat pencari kerja yang telah direkrut ke luar negara tetapi kemudiannya didapati mereka telah ditipu dan pekerjaan tidak wujud, maka wang jaminan tersebut boleh digunakan untuk menyelamatkan mereka dan membawa pulang ke Malaysia.

**iii. Pendakwaan atau kompaun**

Terdapat kesalahan-kesalahan yang boleh didakwa di bawah Akta 246 sekiranya berlaku pelanggaran oleh APS. Antaranya adalah seperti berikut:

- Individu atau agensi yang melakukan aktiviti merekrut tanpa lesen;
- Menukar alamat operasi APS tanpa kebenaran KP;
- Gagal pamer lesen;
- Tidak memohon dokumen pengenalan diri bagi pekerja APS yang menjalankan aktiviti merekrut;
- Memperdaya mana-mana pencari kerja, majikan atau pekerja bukan warganegara dengan memberi maklumat palsu; dan

- Lain-lain kesalahan di bawah Akta 246.

4. Hanya syarikat yang mematuhi syarat-syarat yang ditetapkan sahaja layak memohon dan diberikan lesen untuk menjalankan aktiviti-aktiviti pengrekrutan pekerja. Kegagalan APS menjalankan tanggungjawab, pihak kementerian boleh menggunakan wang jaminan untuk tujuan menampung kos penghantaran balik pekerja yang terkandas, penyediaan tempat tinggal dan makan minum pekerja bukan warganegara tersebut.

5. Pihak jabatan mengesa majikan yang memohon penggajian perlu berurusan melalui Agensi Pekerjaan Swasta (APS) yang berlesen sahaja. Sekiranya terdapat maklumat mengenai aktiviti agen tanpa lesen menjalankan aktiviti berkenaan. Majikan yang terpedaya oleh agensi perlu membuat aduan kepada kementerian ini untuk diambil tindakan sewajarnya mengikut Akta 246 (Pindaan 2017). Mana-mana orang yang menjalankan aktiviti merekrut tanpa lesen yang sah, apabila disabitkan, boleh didenda tidak melebihi dua ratus ribu ringgit atau dipenjarakan selama tempoh tidak melebihi tiga tahun atau kedua-duanya. Pihak jabatan pada masa sekarang sedang mempertingkatkan tindakan penguatkuasaan terhadap mana-mana pihak yang menjalankan aktiviti APS tanpa lesen termasuk memperdayakan majikan yang mengajikan pekhidmat domestik.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN CHARLES ANTHONY A/L SANTIAGO  
(KLANG)**

**TARIKH : 20 JULAI 2020 ( ISNIN )**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI  
DALAM NEGERI** menyatakan bilangan tahanan di lokap polis mengikut  
perincian kaum dan kewarganegaraan bagi setiap tahun dari 2000 hingga  
2019.

**JAWAPAN**

Tuan Yang Di Pertua,

Lokap polis digunakan untuk menahan individu yang disyaki  
melakukan kesalahan di negara ini atau bagi membantu siasatan, tidak  
kiralah individu tersebut merupakan warganegara Malaysia dari mana-mana  
kaum atau bukan warganegara. Lokap polis merupakan suatu tempat  
penahanan orang yang diwartakan di bawah seksyen 7(1) dan seksyen  
7(1A) di bawah Akta Penjara 1995 [Akta 537].

Berdasarkan rekod PDRM, seramai 917,841 telah ditahan pada tahun  
2018 manakala bagi tahun 2019, seramai 816,819 telah ditahan.

**DEWAN RAKYAT  
PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KEEMPAT BELAS (2020)**

---

**PERTANYAAN : LISAN**

**DARIPADA : DATO' SERI AHMAD FAIZAL BIN DATO' AZUMU  
[TAMBUN]**

**TARIKH : 20 JULAI 2020 (ISNIN)**

**SOALAN**

**DATO' SERI AHMAD FAIZAL BIN DATO' AZUMU [TAMBUN]** minta **MENTERI ALAM SEKITAR DAN AIR** menyatakan pemanasan global mendorong perubahan iklim luar biasa, nyata menjejaskan ekosistem di bumi. Kesan perubahan iklim juga dapat dirasai di Malaysia dengan berlakunya musim kemarau dan hujan yang lebih panjang serta tidak menentu. Ketidakstabilan cuaca ini menyebabkan krisis bekalan air ketika musim kemarau dan kejadian banjir yang buruk ketika musim hujan di beberapa negeri. Saban tahun, masyarakat yang mendiami kawasan mudah terjejas banjir diingatkan agar bersedia menghadapi bencana ini. Kesedaran peri pentingnya pemeliharaan dan pemuliharaan alam sekitar memerlukan masa dalam membentuk anjakan budaya khususnya dari kalangan kanak-kanak dan anak-anak muda. Soalan saya :-

- a. apakah usaha Kerajaan dalam memupuk generasi baru yang peka kepada perubahan iklim; dan
- b. apakah bentuk insentif yang disediakan oleh Kerajaan Persekutuan bagi melibatkan pihak swasta dan NGO ke arah usaha tersebut.



**JAWAPAN**

Tuan Yang Di Pertua,

1. Kerajaan sedar bahawa impak perubahan iklim dunia seperti fenomena pemanasan global bukan hanya kepada negara-negara lain di rantau ASEAN sahaja tetapi turut melibatkan Malaysia.
2. Impak ini adalah selari dengan hasil penemuan saintifik oleh *Intergovernmental Panel on Climate Change (IPCC)* di bawah Pertubuhan Bangsa-Bangsa Bersatu yang melaporkan bahawa suhu purata global akan meningkat sebanyak dari julat antara 1.5 darjah ke 2.0 darjah *Celsius* di antara tahun 2030 sehingga 2050. Keadaan ini adalah berpunca daripada kepesatan ekonomi dunia yang banyak membebaskan gas rumah kaca (GHG).

Untuk makluman Ahli-Ahli Yang Berhormat,

3. Kesedaran ataupun *Awareness* terhadap usaha pemeliharaan dan pemuliharaan alam sekitar memerlukan satu anjakan paradigma yang sangat besar di kalangan Generasi Baru seperti golongan belia.
4. Pelbagai usaha dan program sedang dijalankan oleh Kementerian Alam Sekitar dan Air bagi memupuk kesedaran ataupun *Awareness*, untuk generasi baru tersebut, agar mereka lebih peka kepada isu perubahan iklim.
5. Di antara program dan usaha Kementerian ialah:

(i) **DIALOG PERINGKAT KEBANGSAAN**

Kementerian akan melaksanakan Program Dialog Perubahan Iklim bersama Belia (*Youth Climate Change Dialogue*). Program ini dilaksanakan di peringkat Kebangsaan dengan kerjasama Kementerian Pengajian Tinggi dan Kementerian Belia dan Sukan.

Program Dialog ini sepatutnya diadakan pada bulan Mac 2020 tahun ini, tetapi disebabkan Perintah Kawalan Pergerakan (PKP)

yang dilaksanakan sempena pandemic COVID-19, ianya telah di tangguhkan dan akan dianjurkan pada bulan Oktober tahun 2020.

(ii) **RAKAN ALAM SEKITAR**

Program Rakan Alam Sekitar (RAS) merupakan satu program strategik di antara Kementerian dengan masyarakat setempat, untuk memupuk kesedaran melestarikan alam sekitar.

Rakan Alam Sekitar ini membantu Kementerian secara langsung dalam usaha membentaras kegiatan-kegiatan yang mencemarkan alam sekitar.

Rakan Alam Sekitar juga menanam semangat tanggung-jawab dikalangan Rakyat terhadap alam sekitar dengan memberikan informasi kepada saluran yang tepat agar tindakan dapat diambil dengan segera.

Setakat bulan Julai 2020 ini, seramai 305,006 orang Rakyat telah berdaftar sebagai Rakan Alam Sekitar dengan Kementerian.

(iii) **SEKOLAH LESTARI**

Program ini adalah Program Melestarikan Alam Sekitar yang dilaksanakan bersama Kementerian Pelajaran bertujuan memberikan kesedaran dan *Awareness* di peringkat akar umbi dan di kalangan pelajar-pelajar sekolah, agar pelajar-pelajar sekolah mula diperkenalkan dengan gaya hidup hijau atau *Green Life Style* supaya ini akan menjadi sebahagian daripada budaya hidup masyarakat Malaysia.

Pelbagai program diadakan di Sekolah sempena Program Sekolah Lestari, di antaranya Program Aktiviti Mesra Alam, Program Pendidikan Alam Sekitar bagi mewujudkan suasana Sekolah yang kondusif dengan mempraktikkan amalan Hidup Lestari. Selain itu juga turut diadakan program menanam pelbagai jenis pokok dan tumbuhan di kawasan sekolah.

Semenjak tahun 2005 sehingga kini, sebanyak 1,025 Sekolah Menengah dan Rendah menyertai Program Sekolah Lestari dan Anugerah Alam Sekitar.

(iv) **GREEN CAMPUS TOUR**

Kementerian juga telah memulakan Program bersama Universiti-Universiti tempatan yang dinamakan *Green Campus Tour* pada 26 Jun 2020 di Universiti Sains Malaysia, Pulau Pinang.

Objektif Program ini ialah melaksanakan *collaboration* ataupun kerjasama di antara pihak Kementerian Alam Sekitar dan Air dengan Universiti tempatan, bertujuan untuk merealisasikan hasrat Kerajaan agar universiti-universiti tempatan akan menjadi universiti rendah karbon dan akan terus melahirkan produk-produk serta inovasi Hijau terkini untuk memastikan kelestarian alam sekitar di Negara ini bukan sahaja terus dipelihara tetapi ditingkatkan.

Dalam masa yang sama, melalui usaha ini juga kerajaan berhasrat untuk melahirkan ratusan ribu mahasiswa melalui Universiti setiap tahun yang berpotensi dijadikan pemimpin agenda pembangunan Hijau pada masa akan datang.

Selain itu, Kementerian juga berhasrat supaya penyediaan bas elektrik, stesen pengecas kenderaan elektrik, laluan basikal dan pejalan kaki yang khusus dapat memberi kesedaran atau *awareness* kepada mahasiswa dan anak-anak muda mengenai kepentingan Perubahan Iklim.

(v) **PROGRAM JAGUH UNTUK MAHASISWA**

Program Jana Graduan Usahawan Hijau (JaGUH), adalah merupakan program latihan keusahawanan selama 2 tahun yang mensasarkan 10,000 graduan muda untuk menceburi bidang Ekonomi Hijau, terutamanya bagi membantu graduan yang tidak mempunyai pekerjaan.

Program Jaguh adalah satu program dibawah inisiatif *Malaysian Green Technology and Climate Change Center*, salah satu Agensi di bawah Kementerian Alam Sekitar dan Air.

Selain daripada melatih golongan belia ini menceburi bidang Ekonomi Hijau, program ini juga bertujuan menyedarkan ataupun to create *awareness* kepada golongan belia tersebut kepada betapa pentingnya kelestarian alam sekitar dan perubahan iklim kepada Negara terus dipertahankan.

Program Jaguh ini dijangka akan menghasilkan:

- 10,000 Usahawan Muda yang merupakan Perunding Hijau.
- 15,000 Rumah mengamalkan Gaya Hidup Hijau; dan
- 3,000 PKS mengamalkan Strategi Hijau.

6. Kesimpulannya, melalui program dan inisiatif yang dijalankan oleh Kerajaan memperlihatkan kesungguhan Kementerian Alam Sekitar dan Air dalam mengambil berat mengenai masa depan Rakyat dan Negara, khususnya meningkatkan kesedaran mengenai perubahan iklim di kalangan generasi baru. Kerajaan Persekutuan menyediakan pelbagai insentif berbentuk Geran kepada NGO bagi membiayai program dan aktiviti konservasi Alam Sekitar, menangani impak perubahan iklim dan *biodiversity*.

Tuan Yang Di Pertua,

7. Semenjak tahun 2001 sehingga bulan Mei 2020, *Small Grant Program Malaysia (SGP)*, di bawah kawal selia *United Nation Development Programme*, telah membiayai 206 projek dan program menangani impak perubahan iklim dan Alam Sekitar berjumlah 7.46 juta *US Dollars*, bersamaan dengan RM31.33 juta ringgit.

8. Dana antarabangsa ini iaitu dari *Global Environment Facility*, menawarkan insentif berbentuk Geran pembiayaan kepada NGO dan Pertubuhan Masyarakat sehingga RM 210,000-00 ringgit untuk setiap projek berkaitan dengan usaha menangani impak perubahan iklim.

9. Peruntukan ini diberi oleh Negara-Negara Maju kepada Negara-Negara membangun seperti Malaysia, melalui Pertubuhan Bangsa-bangsa Bersatu, bagi membantu usaha meningkatkan kesedaran mengenai Isu Perubahan Iklim yang merupakan masalah global pada masa kini.
10. Kesimpulannya, Kementerian Alam Sekitar dan Air sentiasa berusaha membantu NGO's dan pihak Swasta untuk melaksanakan program dan aktiviti, *to promote Green Life Style and protect the Environment of the Country.*

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB PUAN KASTHURIRAANI A/P PATTO (BATU KAWAN)**

**TARIKH : 20 JULAI 2020 ( ISNIN )**

**SOALAN**

**PUAN KASTHURIRAANI A/P PATTO [ BATU KAWAN ]** minta **MENTERI DALAM NEGERI** menyatakan:-

- a. Bilangan permohonan kewarganegaraan di bawah Perkara 15A, Perkara 16 dan Perkara 19 yang di dalam proses, yang telah diluluskan, yang telah ditolak sehingga kini dan sebab ditolak; dan
- b. Bilangan pemain-pemain bola sepak asing, selebriti atau yang berstatus VIP yang telah dianugerahkan kewarganegaraan sehingga kini dan apakah akta dan peruntukan dalam Perlembagaan Persekutuan yang telah digunakan dalam penganugerahan kerakyatan kepada golongan ini termasuk Liridon Krasniqi.

**JAWAPAN**

Tuan Yang Di-Pertua,

Berdasarkan rekod Jabatan Pendaftaran Negara (JPN) bagi tempoh dari tahun 2018 hingga 30 Jun 2020, sebanyak 21,193 permohonan kewarganegaraan di bawah Perkara 15A, Perkara 16, dan Perkara 19 Perlembagaan Persekutuan telah diterima. Perincian jumlah permohonan berkenaan mengikut status dan Perkara Perlembagaan Persekutuan adalah seperti mana berikut:-

PERKARA	STATUS				
	PROSES	LULUS	TOLAK	BATAL	JUMLAH
15A	11,932	85	3	364	12,384
16	889	109	0	110	1,108
19	7,026	30	4	641	7,701
<b><u>JUMLAH</u></b>					21,193

- a) Penganugerahan kewarganegaraan Malaysia merupakan anugerah tertinggi dan hak eksklusif Kerajaan Persekutuan yang diberikan kepada mereka yang benar-benar layak dan memberi sumbangan kepada Negara. Setiap permohonan kewarganegaraan yang diterima akan diproses dengan teliti dalam memastikan permohonan berkenaan memenuhi syarat-syarat yang ditetapkan dalam Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.
- b) Dalam urusan penganugerahan kewarganegaraan Malaysia kepada Encik Liridon Krasniqi, ianya telah dibuat di bawah Perkara 19 Bahagian III Perlembagaan Persekutuan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AWANG HUSAINI BIN SAHARI  
[ PUTATAN ]**

**TARIKH : 20 JULAI 2020 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan apakah terdapat peruntukan untuk kerja-kerja **membaik pulih struktur bangunan Projek Perumahan Rakyat (PPR)** Kampung Serigei Putatan kerana di kawasan Parlimen P.173 Putatan terdapat rekahan dan kerosakan kritikal di Projek Perumahan Rakyat Kg Serigei, Putatan yang pada bila-bila masa sahaja boleh mengundang kepada kemalangan jiwa. Limpahan air hujan boleh memenuhi tingkat 1 dan 2 bangunan ini.



**JAWAPAN**

Tuan Yang di-Pertua,

1. Untuk makluman Yang Berhormat, PPR Kg. Meruntum, Putatan, Sabah melibatkan pembinaan 500 unit telah siap pada 12 Januari 2017 dan telah diserahkan penyelarassannya dan penyelenggaraan kepada Pihak Berkuasa Tempatan (PBT) iaitu Majlis Daerah Putatan pada 13 Mac 2017.
2. Kementerian Perumahan dan Kerajaan Tempatan (KPKT) menyediakan peruntukan bagi membaik pulih kerosakan/ penyelenggaraan harta bersama secara *one-off* di Program Perumahan Rakyat (PPR) melalui Program Penyelenggaraan Perumahan (PPP).
3. Antara skop kerja yang terlibat di bawah program ini adalah pembaikan atau penggantian lif, tangki air, paip sanitari, bumbung, handrail, pendawaian elektrik, mengecat, kerosakan umum, pagar dan cerun.
4. Walau bagaimanapun, pemeriksaan untuk mengenal pasti keutuhan struktur bangunan yang mengalami keretakan dan kerosakan kritikal tidak termasuk di bawah skop kerja program PPP dan adalah terletak di bawah bidang kuasa Kerajaan Negeri.
5. Sehubungan itu, KPKT menyarankan agar PBT merujuk kepada badan profesional untuk menilai keutuhan struktur bangunan PPR tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KETIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN JUGAH ANAK MUYANG @ TAMBAT  
(LUBOK ANTU)**

**TARIKH : 20 JULAI 2020 ( ISNIN )**

**SOALAN**

**TUAN JUGAH ANAK MUYANG @ TAMBAT [ LUBOK ANTU ]** minta **MENTERI DALAM NEGERI** menyatakan langkah Kerajaan dalam mengatasi isu status "*stateless children*" yang terdapat begitu ramai di Sarawak.

**JAWAPAN**

**Tuan Yang Di-Pertua,**

Kelahiran yang berlaku di Malaysia tidak menyebabkan seseorang individu memperoleh kewarganegaraan Malaysia secara automatik. Kewarganegaraan seseorang individu ditentukan berdasarkan kepada status perkahwinan dan taraf kewarganegaraan ibu bapa kandung sewaktu kelahiran berlaku selaras dengan peruntukan Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Kementerian melalui Jabatan Pendaftaran Negara (JPN) mengambil langkah proaktif dalam memastikan urusan pendaftaran dokumen pengenalan diri dan kewarganegaraan individu yang berkecukupan dapat dilaksanakan dengan mudah di seluruh negara termasuk di kawasan pedalaman melalui inisiatif berterusan iaitu Program Menyemai Kasih Rakyat (MEKAR) yang merangkumi Program Pendaftaran Bergerak (Unit Mobile) dan Bas Mobile. Program MEKAR menyediakan pelbagai perkhidmatan termasuklah khidmat nasihat berkaitan pendaftaran Kad Pengenalan, Kelahiran, dan Kematian.

Selain daripada itu, JPN turut mengadakan taklimat mengenai kepentingan dokumen pengenalan diri dan kerjasama strategik secara berkala bersama Jabatan Pendidikan Negeri/Kerajaan Negeri melalui Ketua Kaum/Ketua Masyarakat bagi mengenal pasti serta mendaftarkan murid-murid sekolah serta penduduk yang masih belum memiliki dokumen pengenalan diri. Sukacita diingatkan bahawa ibu bapa dan penjaga kepada individu yang bertaraf 'Belum Ditentukan' atau 'Bukan Warganegara' bertanggungjawab sepenuhnya untuk menguruskan kewarganegaraan, dokumen pengenalan diri dan dokumen perjalanan dengan negara asal bagi mengelakkan ketiadaan dokumen pengenalan diri, keberadaan tidak sah di Malaysia dan seterusnya disalah anggap sebagai tidak memiliki kewarganegaraan dari mana-mana negara (stateless).

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB DATO' SRI BUNG MOKTAR B. RADIN  
(KINABATANGAN)**

**TARIKH : 20 JULAI 2020 ( ISNIN )**

**SOALAN**

**DATO' SRI BUNG MOKTAR BIN RADIN [ KINABATANGAN ]** minta **MENTERI DALAM NEGERI** menyatakan apakah jaminan bahawa Kerajaan akan mengenakan hukuman yang berat terhadap pengkhianat yang bersubahat dalam penyeludupan masuk pendatang asing tanpa izin (PATI) dan apakah langkahlangkah penambahbaikan yang akan diambil bagi mengekang perkara seperti ini dari berulang.

**JAWAPAN**

Tuan Yang Di Pertua,

Kerajaan sentiasa komited untuk membanteras jenayah penyeludupan migran atau pendatang asing tanpa izin (PATI) ke Malaysia. Dalam hal ini, mekanisma perundangan sedia ada seperti Akta Antipemerdagangan Orang dan Antipenyeludupan Migran (ATIPSOM) 2007 jelas menerangkan mengenai hukuman kepada mana-mana orang yang melakukan kesalahan penyeludupan migran ke Malaysia dan kepada mana-mana orang yang bersubahat dalam melakukan jenayah tersebut.

Mana-mana individu atau pertubuhan perbadanan yang didapati bersalah melakukan jenayah penyeludupan migran atau yang bersubahat dalam jenayah tersebut boleh dihukum dengan pemenjaraan selama tempoh tidak melebihi daripada tiga (3) tahun hingga tempoh maksimum dua puluh (20) tahun, dan boleh juga dikenakan denda tidak kurang daripada RM50,000.00 hingga RM1,000,000.00 bagi individu serta minimum RM1,000,000.00 dan RM5,000,000.00 bagi pertubuhan perbadanan, atau kedua-duanya sekali. Tambahan pula, Kerajaan kini dalam proses meminda Akta ATIPSOM 2007 yang secara khusus mengkaji hukuman yang lebih berat kepada mana-mana individu yang melakukan atau bersubahat melakukan jenayah penyeludupan migran.

Dalam usaha berterusan Kerajaan menangani isu penyeludupan migran ke Malaysia, Kerajaan telah menubuhkan *National Task Force* (NTF) yang dianggotai oleh Angkatan Tentara Malaysia (ATM), Polis DiRaja Malaysia (PDRM), Agensi Penguatkuasaan Maritim Malaysia (APMM) dan Agensi Keselamatan Sempadan Malaysia (AKSEM) serta melaksanakan Operasi Benteng bagi mengawal ketat sempadan negara secara bersepadu daripada dibolosi oleh PATI. Pada masa yang sama, PDRM telah menggunakan Akta Kesalahan Keselamatan (Langkah-langkah Khas) 2012 (SOSMA) untuk menahan dan menyiasat ahli-ahli sindiket penyeludupan migran termasuk tekong laut, tekong darat, agen dan penyedia rumah tumpangan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN MOHD NIZAR B. ZAKARIA (PARIT)**

**TARIKH : 20 JULAI 2020 ( ISNIN )**

**SOALAN**

**DATO' MOHD. NIZAR BIN HAJI ZAKARIA [ PARIT ]** minta **MENTERI  
DALAM NEGERI** menyatakan :

(a) adakah Kerajaan bersedia untuk menubuhkan Suruhanjaya Siasatan Diraja (RCI) bagi menyiasat kes penyeludupan warga asing yang turut didalangi oleh anggota keselamatan negara; dan

(b) apakah langkah strategik yang akan dilaksanakan bagi membanteras aktiviti penyeludupan pendatang asing tanpa izin ini.

**JAWAPAN**

Tuan Yang Di Pertua,

Kementerian berpandangan buat masa ini tindakan dan penguatkuasaan perundangan sedia ada seperti Akta Antipemerdagangan Orang dan Antipenyeludupan Migran 2007 (ATIPSOM) dan Akta Kesalahan Keselamatan (Langkah-Langkah Khas) 2012 (SOSMA) adalah memadai.

Di antara langkah penguatkuasaan yang diambil adalah melalui Ops Benteng yang dilancarkan pada 1 Mei 2020 dengan diketuai oleh ATM dan dianggotai oleh PDRM, APMM dan Agensi Penguatkuasaan lain. Sepanjang tempoh pelaksanaan Ops Benteng, seramai 24 anggota penguatkuasa termasuk polis, tentera dan Jabatan Imigresen telah ditahan di bawah prosedur Akta Kesalahan Keselamatan (Langkah-Langkah Khas) 2012 atau SOSMA kerana disyaki terlibat dalam sindiket jenayah terancang penyeludupan migran sejak 2017.

Bagi menjawab soalan kedua pula, Kementerian Dalam Negeri melalui agensi-agensi di bawahnya, telah menjalankan beberapa langkah strategik bagi membanteras aktiviti penyeludupan PATI. Ini termasuklah melalui penguatkuasaan undang-undang sedia ada seperti Akta Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (AMLA) dan Akta Pencegahan Jenayah 1959 (POCA) dan Akta Kesalahan Keselamatan (Langkah-Langkah Khas) 2012 atau SOSMA. Disamping itu, pengukuhan aset strategik dan teknologi akan turut diberi penekanan. Ini termasuklah aset-aset seperti dron, Kamera TV Litar Tertutup (CCTV) berteknologi 5G dan peningkatan keupayaan kenderaan operasi.

Selain itu, operasi secara bersepadu yang melibatkan kepelbagaian agensi penguatkuasaan seperti Ops Benteng dan Ops Naga akan diteruskan di samping mempertingkatkan risikan dan operasi di lokasi panas/hotspot kemasukan PATI seluruh Negara.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB DATUK SERI DR WAN AZIZAH (PANDAN)**

**TARIKH : 20 JULAI 2020 ( ISNIN )**

**SOALAN**

**DATO' SERI DR. WAN AZIZAH WAN ISMAIL [ PANDAN ]** minta **MENTERI DALAM NEGERI** menyatakan apakah alternatif yang Kerajaan sediakan untuk melindungi kanak-kanak yang ditahan di Depot Tahanan Imigresen (DTI) memandangkan operasi memburu pendatang tanpa izin serta penularan wabak COVID-19 di DTI membahayakan keselamatan dan kesihatan kanak-kanak yang ditahan.

**JAWAPAN**

**Tuan Yang Di Pertua,**

Kementerian Dalam Negeri (KDN) melalui Jabatan Imigresen Malaysia (JIM) sentiasa menitikberatkan hal ehwal kebajikan tahanan terutamanya tahanan kanak-kanak di Depot Tahanan Imigresen dengan menyediakan penjagaan khas terhadap mereka semasa dalam tahanan seperti bekalan susu sebagai makanan tambahan. Setiap tahanan kanak-kanak yang ditempatkan di Depot Tahanan Imigresen juga diasingkan mengikut jantina dan umur selaras dengan Arahan Tetap Ketua Pengarah Imigresen Mengenai Prosedur Pentadbiran dan Pengurusan Depot Imigresen. JIM juga sentiasa membuat penambahbaikan di Depot Tahanan Imigresen sedia ada dengan menyediakan ruang dan fasiliti yang sesuai untuk kanak-kanak.



Dari aspek kesihatan tahanan, pihak JIM bekerjasama dengan Kementerian Kesihatan Malaysia (KKM) untuk menempatkan 14 orang Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan kanak-kanak. Klinik kesihatan yang berhampiran telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot. Pemantauan kesihatan secara berkala turut dilakukan oleh KKM ke Depot Tahanan Imigresen dari semasa ke semasa.

**Tuan Yang Di Pertua,**

Untuk makluman Ahli Yang Berhormat, Kementerian Dalam Negeri (KDN) sedang meneliti kaedah alternatif bagi memastikan kesejahteraan tahanan kanak-kanak di Depot Tahanan Imigresen. Untuk merealisasikan hasrat ini, Kementerian Dalam Negeri (KDN) bersama-sama Kementerian Pembangunan Wanita, Keluarga dan Masyarakat (KPWKM) adalah dalam usaha untuk melaksanakan projek rintis *Alternative to Detention* (ATD) secara berperingkat yang disasarkan kepada tahanan kanak-kanak.

Projek rintis yang sedang dirangka ini melibatkan kerjasama antara Jabatan Kebajikan Masyarakat (JKM) dan Jabatan Imigresen Malaysia (JIM) sebagai agensi pelaksana serta turut dibantu oleh Pertubuhan Bukan Kerajaan (NGO).

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB DATUK WILSON UGAK ANAK KUMBONG  
(HULU RAJANG)**

**TARIKH : 20 JULAI 2020 ( ISNIN )**

**SOALAN**

**DATUK WILSON UGAK ANAK KUMBONG [ HULU RAJANG ]** minta **MENTERI DALAM NEGERI** menyatakan sekiranya pihak Kementerian bercadang untuk membina ICQ di Kem Tapak Megah, Bahagian Kapit dan di Long Singgut, Bahagian Kapit.

**JAWAPAN**

Tuan Yang Di Pertua,

Buat masa ini, Kementerian belum mempunyai sebarang perancangan bagi membina Kompleks Imigresen, Kastam, Kuarantin dan Keselamatan (ICQS) di Kem Tapak Megah, Bahagian Kapit dan di Long Singgut, Bahagian Kapit. Penentuan keperluan bagi perancangan dan pembinaan sesebuah Kompleks ICQS adalah bergantung kepada kadar keluar masuk pengembara di kawasan sempadan tersebut serta kesediaan tapak yang amat bergantung kepada bantuan daripada Kerajaan Negeri untuk memberikan tapak yang benar-benar strategik.

Kerajaan Negeri perlu memastikan jalan yang menghubungkan dengan pihak Indonesia merupakan rizab jalan dan telah dibuat pengambilan (sekiranya tanah milik individu). Selain itu, KDN hanya akan mempertimbangkan tapak yang berada betul-betul di sempadan negara di mana Kompleks ICQS akan dibina di atas jalan tersebut.

**PEMBERITAHUAN PERTANYAAN LISAN  
DEWAN RAKYAT MESYUARAT KEDUA,  
PENGAL KETIGA, PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJAH AZIZAH BINTI  
DATUK SERI PANGLIMA HAJI MOHD DUN  
[ BEAUFORT ]**

**TARIKH : 20 JULAI 2020 (ISNIN)**

**SOALAN**

minta **MENTERI PEMBANGUNAN USAHAWAN DAN KOPERASI** menyatakan apakah inisiatif Kementerian dalam membantu usahawan PKS yang terjejas akibat penularan wabak pandemik COVID-19.

**JAWAPAN**

Tuan Yang di-Pertua,

1. Kementerian Pembangunan Usahawan dan Koperasi (MEDAC) telah mengambil tindakan proaktif untuk membantu usahawan yang terjejas akibat penularan wabak pandemik COVID-19. MEDAC sebagai kementerian yang bertanggungjawab memastikan ekosistem keusahawanan yang holistik dan kondusif untuk menyokong agenda pembangunan keusahawanan negara, telah membangunkan Pelan Pemulihan Usahawan dan Koperasi. Pelan pemulihan ini dibangunkan bertujuan menangani kesan yang dihadapi oleh para usahawan tempatan. Ianya telah dirangka untuk semua sektor perniagaan merangkumi perusahaan mikro, Perusahaan Kecil dan Sederhana (PKS), koperasi, *Social Entrepreneurship* (SE), *startup* dan sektor informal bagi memastikan kelestarian serta pemulihan operasi perniagaan usahawan dalam tempoh masa yang optimum.

2. Antara langkah-langkah yang telah diambil dan akan dilaksanakan oleh MEDAC menerusi agensi-agensi di bawah kementerian merangkumi penyediaan pembiayaan kepada usahawan, penjadualan semula pinjaman dan penangguhan bayaran balik, moratorium, latihan serta bimbingan keusahawanan secara dalam talian dan pelaksanaan program berimpak tinggi. Pelan Pemulihan ini mengandungi **29 program jangka pendek dan sederhana di bawah enam (6) strategi** yang dijangka akan memanfaatkan lebih 20,000 penerima dan melibatkan **kos peruntukan yang dianggarkan sebanyak RM 362.79 juta bagi pelaksanaan tahun 2020 dan 2021.**

Sekian, terima kasih.